



Fonotaga Faaleaoaoga
a Taitai i le Lalolagi Atoa
“Atiina Ae o se Fanau Amiotonu”

9 FEPUARI, 2008

○ LE EKALEZIA A IESU KERISO ○ LE AU PAIA ○ ASO E GATA AI

Faasalalauina e le
O Le Ekalesia a Iesu Keriso o le Au Paia o Aso e Gata Ai
Aai o Sate Leki, Iuta

© 2008 e le Intellectual Reserve, Inc.
Ua taofia aia tatau uma
Lolomi i le lunaite Setete o Amerika

Faamaonia le faaPeretania: 5/07
Faamaonia le faaliliuga: 5/07
Faaliliuga o le: *Worldwide Leadership Training Meeting, "Building Up a Righteous Posterity,"*
February 9, 2008
06761 890

Faasino Mataupu

O Faatulagaga Lautele ma Olaga Patino	2
<i>Elder Jeffrey R. Holland</i>	
O Le Folafolaga i le Aiga.	4
<i>Peresitene Boyd K. Packer</i>	
Faatalatalanoaga	10
<i>Elder Dallin H. Oaks</i>	
<i>Elder Jeffrey R. Holland</i>	
<i>Julie B. Beck</i>	
<i>Susan W. Tanner</i>	
<i>Cheryl C. Lant</i>	
O Se Sulufaiga Mai le Lalolagi	29
<i>Peresitene Thomas S. Monson</i>	

O Faatulagaga Lautele ma Olaga Patino

ELDER JEFFREY R. HOLLAND

O Le Korama a Aposetolo e Toasefululua



O Le Faamamafa Faifaiepa i le Aiga

Uso e ma tuafafine, matou te faafeiloai atu ia te outou i la tatou faasalalauga o aoaoga faaleautaitai i le lalolagi atoa o le 2008. O la tatou autu i le asō “Atiina ae o se Fanau Amiotonu” o loo faaauau ai le faamamafa a le Ekalesia i le aiga. I le lua tausaga ua tuanai, na faaautuina ai le faasalalauga i le “Lagolagoina o le Aiga,” o loo aofia ai fautuaga o le a taua i le asō.

Sa outou faafofoga foi i savali tau-talagia ma tusitusia, e aofia ai tusi na faapuina lelei mai le Au Peresitene Sili e uiga i le moomia ona faamalosi ma puipuia le aiga. O se tasi o na tusi, sa tatau ona faitau i sauniga faamanatuga ma auina atu i aiga e faiaoga o aiga, o loo aofia ai upu nei: “Matou te talosaga atu i matua ina ia tuuina atu atoatoa a latou taumafaiga sili i le aoaoina ma le faafaileleina o a latou fanau i mataupu faavae o le talalelei ia o le a faaauai atili i latou i le Ekalesia. . . . Peitai, tusa pe o le a le taua ma le talafeagai o isi gaoioiga, e le tatau ona faatagaina e suitulaga i tiute ua faatonuina mai e le Atua, ia e na o matua ma aiga e mafai ona faia lelei ai.”¹

Ua outou silafia o loo matou talanoa atu i tagata matutua uma o le Ekalesia i le faasalalauga leneni. E le masani ona valaaulia le autalavou matutua i se talanoaga e uiga i le atiina ae o ni fanau amiotonu. Ae ua matou tuuina atu ma le iloa lelei lea valaaulia. O outou talavou matutua nofufua e tatau ma o le a avea ma matua o a taeao. A o outou fuafua ma

saunia mo lena avanoa, o outou o se vaega o fanau a o outou matua i le taimi nei ma le lumanai. Matou te tatalo ia outou tuuto faamaoni uma atu i mataupu faavae o le aiga o loo faia e le Ekalesia ma o outou matua.

E le gata i lea, ua matou iloa o nisi o la tatou aofia ma le Ekalesia e lei faaipoipo i le taimi nei, pe le o i ai foi ni aiga e fetau ma le manatu lea e masani ona taua i le Ekalesia.

Faamolemole ia outou talitonu ua matou iloa lelei le eseese o le tele o tulaga o loo i ai i o tatou tagata. Matou te alolofa ia te outou uma. Matou te iloa foi a o saga faateleina pea aiga e malepelepe ma ua faateleina foi aganu'u e taufaatauvaina le faaipoipoga, o fanau, ma le olaga masani faaleaiga, ua lagona ai e le Au Pulega Aoa ma taitai aoa o le Ekalesia le matua tatau ona faatelelise ona talanoa atu i tulaga ma mataupu faavae autu o le talalelei. A leai, o le see ese mai amioga lelei lea o loo iloa lelei e le lalolagi e mafai ona ave atu ai i tatou i se tulaga lea o loo opeopea ai tagata faamaoni o loo i totonu ma fafo o le Ekalesia pe a oo i faamoemoega paia o le faaipoipoga ma faatulagaga faavavau o le aiga.

Mamanu ma Faaitaiga

Sei o'u faaogaina se faataoto ou te faamoemoe e mafai ona faailoa atu ai leneni manatu, po o le a lava lou tulaga faaipoipo po o lou aiga o i ai. Ou te taua “O Le Faataoto i le Ofutino na Su'i i le Fale.” O lou tina o se suisui lelei tele. I aso a o ou itiiti, i le le lava o se tupe, o nisi taimi na te suiina ai o matou ofu aoga. Afai ou te vaai i se ofu i le faleoloa po o se tusiata, e fai

mai lava lo'u tina, "Pei uma lava e mafai ona ou suia le ofu le la." O le vaai totoa i le ofu, na te tipiina ai le ie ma sui i se mafai e tai pei uma lava o le ofu taugata.

Ou te faamalo ia te ia mo le naunau ma le mafai ona ia faia. Ae sa le manao e fai faapena. Sa manao lava o ia i se mamanu. E lelei le mamanu na te iloa ai itu, tulimanu, afega, ma su'iga sa faigata ona iloa. E le gata i lea, afai na te toe suia nisi ofutino, e galue i taimi uma mai se mamanu autu ma atoatoa, ae le toe faia ai mea sese o se ofu faaitaitai.

Atonu ua outou iloa lo'u manatu ma lona manatu. E mautinoa lo tatou afaina pe a su'i se ofutino mai se ofutino na fua i se ofutino. O se sese e tasi pe lua i le ofu muamua—na mafua ona o le leai o se mamanu—e toe fai foi ma saga fai, ma atili faigata ai, i le fai soo, ma iu ai ina le toe ofi le ofu lea e tatau ona ou ofuina i le aoga. E umi le isi lima. E puupuu le isi. O le sooga o le tauau e oo i lo'u fatafata. O le isi e oo i lo'u tua. O le faamau i luma o le kola e kami mai tua o lo'u ua. Ou te fai atu, o foliga faapena, e le oo atu i le vasega fitu.

O Le Mamanu Atoatoa mai le Atua

O lenei, ou te faamoemoe e fesoasoani lenei mea tou te malamalama ai i le pogai tatou te talanoa ai e uiga i le mamanu atoatoa, o le faaiipoipoga ma le aiga, ae ua tatou iloa lelei e le o la tagata uma i lona tulaga. E matuai sao atoatoa ona e toatele latou te le o mauaina, pe atonu e lei vaai foi i ai i lona mamanu atoatoa, ae o nisi atonu ona o malosiaga faaleaganuu ua ave-



E mafai ona tatou ioe i le mamanu aua e aumai i le Atua, ma e mafai ona tatou taumafai mo lona faatinoga i le mea sili tatou te mafaia.

ese malie ai i tatou mai lona mamanu atoatoa, lea tatou te talanoa ai e uiga i le mea o loo finagalo ai le Tama Faalelagi mo i tatou i Lana fuafuaga faavavau mo Lana fanau.

E ao ona faia fetuunaiga patino i le eseese ai o tulaga faalefaaiipoipoga ma faaleaiga. Ae tatou te ioe uma i le mamanu e pei ona aumaia mai le Atua, ma taumafai ai i le mea sili tatou te mafaia.

O i matou o Pulega Aoa ma taitai aoao ua valaauina e aoao atu Ana tula-fono lautele. Ona tatou ola lea i ni olaga patino ma e ao ona saili le taitaiga a le Alii e faatatau i tulaga patino. Ae o le a tele le fenumiai ma le ave-esea o folafolaga o le talalelei pe afai e leai ni talitonuga ma ni faatulagaga o aoaoga faavae e faatuina, ma e pei ona i ai o tatou aso, ia faia soo. Tatou te maua le malosi i le iloa na fetalai mai le Alii i nei mataupu, ma tatou talia Ana fautuaga e ui atonu e le lauiloa.

Faafetai atu mo le malamalama i le mafuaaga matou te popole ai i le puipuia o tagata uma o aiga, e tusa po o le a lou matua, ma le mafuaaga matou te tete ai i malosiaga o loo saili e faatamaia soo se tulaga o le fuafuaga paia o le fiafia a le Atua. Tatou te faafetai i le fetalai a le Alii, "Ou te tuu atu ia te outou se faatusa i mea uma, ina ia le faaseseina outou" (MFF 52:14).

FAAMATALAGA

1. Tusi a le Au Peresitene Sili, 11 Fep., 1999. E mafai ona tatou ioe i le mamanu aua e aumai i le Atua, ma e mafai ona tatou taumafai mo lona faatinoga i le mea sili tatou te mafaia.

O Le Folafolaga i le Aiga

PERESITENE BOYD K. PACKER

Peresitene o le Korama a Aposetolo e Toasefululua



Manatu Musuia

Ua ou matua faafetai lava i lo'u auai i lenei fonotaga ma e faafeiloai atu ia te outou uma i le salafa o le lalolagi, i lenei sauniga paia ma le mamalu, ma atonu o le mataupu aupito taua lenei e mafai ona matou auina atu ia te outou mai le au taitai o le Ekalesia. Ua matou matauina e pei foi ona outou matauina mamanu o le lalolagi, ma ua matua faateleina ai lava le atugalua e uiga i mataupu i le aiga ma le auaiga.

O Le Ekalesia a Iesu Keriso o le Au Paia o Aso e Gata Ai, o le Ekalesia toefuataiina, ma o lona uluai faatomuaga lava o le faaali mai lea o le Tama ma le Alo i le Perofeta o Iosefa Samita. I lona Uluai Faaaliga maoae, e pei ona tatou ta'ua ai i le taimi nei, e lua ni manatu ofoofogia na faaaliga mai ai, lea sa taiala mai ai le Ekalesia talu mai lona taimi.

O le mea muamua: O Ia o le Tama. E ui i faalagiga uma atonu na faalagiga ai e le Atua Ia lava, na Ia filifilia le faalagiga e sili atu ona latalata ia i tatou uma lava. O Ia o lo tatou Tama. Ma ua tatou taliaina—o i tatou o fanau a le Atua. Ma o le i ai o le Alo iina, na avea ai o se faailoaga mai o se aiga. O lea na afifio mai ai le Tama ma le Alo.

I se faaaliga na tuuina mai ae lei leva ona mavae lona taimi, na fetalai mai ai le Alii, "O le mea lea, o A'u le Alii ina ua iloa le malaia o le a oo mai i luga o tagata o le lalolagi, na ou valaauina la'u auauna o Iosefa Samita le Itiiti ma ua ou tautala atu ia te ia mai le lagi, ma ua tuuina atu ia te ia poloaiga" (MFF 1:17).

Ola e ala i Faaaliga

Ma o se amataga lona. O le mamanu ua ta'u mai ai e tatau ona tatou gaoioi i ai ma faatulaga ai ma ola ai e tusa ma faaaliga ua tuuina mai e le Alii. O nei faaaliga e pei ona outou silafia, ua tuu faatasia i le tusi o Mataupu Faavae ma Feagaiga ma faaaliga i le Tusi a Mamona ma le Penina Tau Tele, ua fausia ai le faavae faatusitusiga paia mo le Ekalesia.

Ua tatou iloa e lei faatulagaina e le Alii le Ekalesia e tusa ma mamanu a isi Ekalesia i le lalolagi. O lona uiga, e leai ni faifeau faapolofesa. E leai ni a tatou aoga faafaifeau e pei ona masani ai isi lotu, e sauniuni ai alii po o ni tamaitai faifeau e taitai le Ekalesia. O loo aoteleina i se isi fuaiupu e faapea "ia mafai ona taitoatasi le tagata ma tautala atu i le suafa o le Atua le Alii, . . . o le Faaola o le lalolagi" (MFF 1:20).

Ua tatou iloa i lona mau se tulaga tutusa o alii e umia le perisitua faapea foi tamaitai e tutu i o latou autafa. Tatou te galulue faatasi ma e faatulagaina muamua lava i tatou o ni aiga. Ua ia i tatou uma le aia tatau mo musumusuga ma faaaliga, ma e tatou te matua manaomia lava i lenei lalolagi, aemaise i le luitau tele o le tausia o se aiga.

Tausia o se Fanau Amiotonu

Ia, o le autu o lenei fonotaga o le tausia lea o se fanau amiotonu; o se matafaioi. O le uluai poloaiga lava na tuu atu ia Atamu ma Eva o le tatau lea ona la fanafanau ma ia uluola e faatumu ai le lalolagi, ma o auala e fanafanau ai na tuuina atu ia te i la'ua i totonu o o la'ua tino. Ma o le a faa-



O le uluai poloaiga na tuuina atu ia Atamu ma Eva o le fanafanau ia uluola ma faatumu ai le lalolagi. E faaauau pea lava lena mamanu i le talafaasolopito o tagata soifua uma.

auau pea lena mamanu i faamau-mauga uma o le talafaasolopito o le tagata soifua.

O lea la sa i ai le uluai aiga—o Atamu ma lona faletua, o Eva, ma a la’ua fanau. Ua tatou iloa sa i ai se taua i le lagi, ma sa i ai foi se fouvalega ma na tuliese ai Satani, ma sa naunau Satani e faaleaga le fuafuaga a le Silisiliese ma sa lava lelei le iloa e Satani, pe sa lava foi lona atamai, pe lava foi lona musuia e iloa ai e tatau ona amata lana faatafunaga i le aiga. Ma ua tatou vaaia lena mea i le tala ia Atamu ma Eva. Ona oo lea ina ua tatala mai le talafaasolopito o le Ekalesia, sa tulai mai le tiutetauave o matua ma fanau.

O Se Folafolaga i le Lalolagi

E lei leva tele atu ni tausaga talu ai, sa i ai se mau i le lalolagi e faatatau i le aiga. Ma sa taloina e Malo Afaatasi se fonotaga e uiga i le aiga, i Beijing i

Saina. Sa matou auina atu se usuga-fono i lena fonotaga e uiga i le aiga, ma isi foi fonotaga sa faia. Ona fofogaina mai ai lea o se tasi o na fonono o le a faia e latalata mai i lo tatou laumua, ma sa matou mafaufau, “Ia, afai o le a o mai iinei, e lelei pe a tatou faailoa atu i ai i tatou lava.”

O se folafolaga i le Ekalesia, o se faasilasilaga taua ma le maoae lena. E laitiiti lava ni folafolaga na tuuina atu talu mai le amataga o le Ekalesia. E maoae; e ala mai i faaaliga. Ma i lena taimi, ua silia laitiiti ma le 10 tausaga talu ai, na tuuina atu ai e le Usoga le “O Le Aiga: O Se Folafolaga i le Lalolagi.” E pei lava o se tusi paia i lona mana.

Ia, o le a outou faafofoga i isi folasaga, e toatele o le a faasino atu i le folafolaga i le aiga. Ou te manatu, o se faamoemoega lelei le faitau atu ia te outou. Ua tatou iloa ua uma ona tatou faitauina. Ae afai tatou te faitau malie

i ai, ma ia matua manino lelei, e mafai ona tele atu ni faaaliga o i ai nai lo le mea sa outou manatu ai muamua.

A outou tau manatunatu pe aisea ua tatou faapenei ai, ma pe aisea foi tatou te faia ai mea tatou te faia ma pe aisea foi o le a tatou le faia ai nisi o mea tatou te le faia, e mafai ona outou maua le uunaiga mo lena mea, i lena folafolaga i le aiga. E i ai taimi e tuua’ia ai i tatou i lo tatou le onosa’i ona tatou te le taliaina ma faia mea e tatau ai ma tulaga faatonuina o faalapotopotoga. Ia, o mea o le a tatou le faia, tatou te le faia lava. Ma o mea o le a tatou le faia, e le mafai lava ona tatou faia, aua o le tulaga faatonuina tatou te mulimuli ai, ua tuuina mai lava e Ia.

Se’i tau ina ou faitauina atu le folafolaga ia te outou, ae outou faalogo- logo mai i ai ma vaai pe tou te le vaai

ai i mea o loo lalamua ai i le taimi nei ia faalapotopotoga, o polokiki, o le malo, o lotu i le taimi nei ua afua ai le tele o atugaluga ma faigata. Ma o le a outou mauaina tali iina. Ma o tali fo'i o i ai iina, o tali a le Ekalesia.

“O Le Aiga: O Se Folafolaga i le Lalolagi”¹

“O Le Au Peresitene Sili ma le Aufono a Aposetolo e Toasefululua O Le Ekalesia a Iesu Keriso o le Au Paia o Aso e Gata Ai

“O i matou, o le Au Peresitene Sili ma le Aufono a le Au Aposetolo e Toasefululua O Le Ekalesia a Iesu Keriso o le Au Paia o Aso e Gata Ai, matou te tautino atu ma le faamaoni, o le faaipoipoga i le va o se alii ma se tamaitai, ua faauuina e le Atua, ma o le aiga o le totonugalemu lea o fuafuaga a Le Fofoa, mo le taunuuga e faavavau o Lana fanau [uma].”

Muai Olaga

Ua tatou iloa i le Ekalesia mai aoaoga faavae ua faaalua mai ia i tatou, sa i ai so tatou muai olaga. E lei faatoa amataina ina ua i ai tagata soifua i le lalolagi. Sa lei fou foi aoaoga faavae o le talalelei ina ua faaalua i le Perofeta o Iosefa Samita. E aumai uma lava mai le faavavau ma o le a i ai foi mo le faavavau atoa. Faafofoga lelei mai lava:

“O tagata soifua uma—tane ma le fafine—ua fofoaina i le faatusa o le Atua. O i latou taitoatasi o se atalii po o se afafine faaleagaga faapelepele a ni matua faalelagi ma, o lea ua tofu ai i latou taitoatasi ma se natura ma se taunuuga paia. O le tulaga tane po o le fafine (o le tagata) o se vaega taua lea o le muai olaga, olaga faitino, ma lona faamoemoe e faavavau.”



“I le muai olaga, sa iloa ma tapuai atalii ma afafine faaleagaga o le Atua o lo latou Tama e Faavavau, ma sa [latou] talia Lana fuafuaga e mafai ai e Lana fanau ona maua ni tino faaletino ma le tomai faalelalolagi latou te maua ai le atoatoaga ma iloa tino ai lona taunuuga paia o se suli o le ola e faavavau. O le fuafuaga paia o le fiafia, ua mafai ai ona faaaauu fegalegaleaiga faaleaiga i tala atu o le tuugamau.”

O Le Fuafuaga Sili o le Fiafia

Ia matau ua faamatala mai ai, o le fuafuaga o le fiafia. O loo faamatala mai foi i se isi mea, i le Tusi a Mamona, e faapea o le “ala sili o le fiafia” (Alema 42:8).

“O le fuafuaga paia o le fiafia, ua mafai ai ona faaaauu fegalegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia aiga e faavavau.”

“O le uluai poloaiga na tuuina e le Atua ia Atamu ma Eva, e faatatau i lo la agavaa mo tulaga faamatua, o se tane ma se ava. Matou te tautino atu o le poloaiga a le Atua i Lana fanau ia fanafanau ma ululuola ai le lalolagi ua faamalosia ma faatumauina. Matou te toe tautino atu foi ua poloai mai le Atua, o mana paia o le fofoaina o fanau, ua na o le va lava o le alii ma le tamaitai ua faaipoipoina faaetulafono, o se tane ma le ava, e tatau ona faaagaina ai.”

O le a outou matauina, a o tatou faitau i leni folafolaga, o le a outou silafia ai le luitauina o na tautinoga. E manao le lalolagi ina ia suia. O le a tatou le suia lava. E le mafai ona tatou faia. A outou manatunatu pe o ai i tatou, ma pe aisea foi ua tatou i ai, ua ia te i tatou leni mamamu ma o le a tatou mulimuli ai.

“Matou te tautino atu o le ala ua fofoaina ai le ola faitino, ua faatuina i le finagalo paia. Matou te faamaonia le paia o le ola ma lona taua i le fuafuaga e faavavau a le Atua.”

O lo tatou tulaga i mea e pei o le tatala o faaipoipoga, o le faapau pepe, po o mataupu e faatatau i itupa o loo faailoa mai ma ootoo mai i faaaliga, ma o le folafolaga e uiga i le aiga o le faamatalaga aupito manino lena ua tatou maua e uiga i na faafitauli.

Tiute Faamatua

“O le tane ma le ava ua i ai le tiute-tauave paia e alofa ma tausii e le tasi le isi ma a la fanau. ‘O fanau o le tofi lea mai le Alii’ (Salamo 127:3). Ua i ai i matua se tiute paia e tausii a latou fanau i le alofa ma le amiotonu, ia tuuina atu i ai mea e manaomia i le faale-

agaga ma le faaletino, ia aoao i latou e alolofa ma feauaunaai, ia tausia polo-aiga a le Atua ma aveva ma tagatanuu usiustai i tulafono i soo se mea e nonofo ai. O tane ma ava—tina ma tama—o le a latou tali atu i le Atua mo le faataunuuna o nei mea e ao ona faia.

“O le aiga ua faauuna e le Atua. O le faaiipoiga i le va o le alii ma le tamaitai e taua i Lana fuafuaga e faavavau.”

Ma o totonu o le Ekalesia, e leai lava se isi mamana tatou te iloina mo le faaiipoiga—o le faaiipoiga o le va o le tane ma le ava.

“E tatau ona fanauina fanau i totonu o feagaiga o le faaiipoiga, ma ia tausia e se tama ma se tina o e ua faamamaluina ma le faatuatua atoatoa feagaiga faaleulugalii. E maua le fiafia i le olaga faaleaiga pe a faavae i aoaoga a le Alii o Iesu Keriso.”

Sa masani lava ona ou lagona, o le faamoemoega maualuga lava o gaoioiga uma ma polokalama a le Ekalesia e faalagolago i se alii ma se tamaitai ma le fiafia o lo latou aiga i le fale.

“O faaiipoiga ma aiga manuia, e faavae ma tumau i mataupu faavae o le faatuatua, tatalo, salamo, faamagaloga, faaloalo, alofa, agalelei, galuega, ma gaoioiga faafiafia tuuafaatasi. I le fuafuaga paia, e tatau ona pulefaamalumu tama i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo o latou aiga. O uluai matafaioi a tina o le faafaileleina lea o a latou fanau. O nei matafaioi paia, e ao i tama ma tina ona fesoasoani le tasi i le isi o se paaga tutusa. O mea e

faaletonu, oti, po o nisi mea e tulai mai, e alagata ai ona fetuutuunai tagata taitoatasi. E tatau i aiga lautele ona tuuina atu le lagolago pe a manaomia.

O Se Lapataiga

“Matou te lapatai atu”—tatou te le faaogaina soo lena upu, ae ua talafeagai lava i i—“Matou te lapatai atu o tagata taitoatasi o e ua solia feagaiga o le ola mama, o e faasaunua i taitoalua po o fanau, o e ua faatalale i le faataunuuna o tiutetauave faaleaiga, o le a i ai se aso tou te tutu atu ai e tali atu i luma o le Atua. E le gata i lea, matou te lapatai atu foi, o le faamalepeina o le aiga o le a aumai ai i tagata taitoatasi, alaalfaga, ma malo, faafanoga ia na uluai tau mai e perofeta anamua ma aso nei.

“Matou te valaau atu i tamalii ma failauga ma taitai o malo i soo se mea ina ia faalauiloa atu na fua faatatau ua fuafuaina ina ia faatumauina ma faamalositia le aiga o se iunite faavae o malo.”¹

Aoaoga Faavae ma Sauniga

Ia, o le a outou faafofoga i faatinoga e tuuina atu i lenei fonotaga faaleaoga i le lalolagi atoa, i faatatau tonu ma faatonuga atoa ai ma fautuaga ma taiala, ae e taulai uma lava i faaaliga a tusitusiga paia, o aoaoga faavae, ma mataupu faavae e pei ona tautino mai i le folafolaga i le aiga.

A outou vaavaai solo outou tupulaga talavou na o loo faatalitali atu nei mo se faaiipoiga ma se olaga faaleaiga ma outou vaaia ai tulaga matautia, e na o le tasi lava le nofoaga o i ai i lenei lalolagi e mafai ona puipuia atoa ai le aiga, o totonu lea o sauniga ma aoaoga faavae o le talalelei a Iesu Keriso. Ola ai i le talalelei ona le afaina lava lea o oe.





E le faigofie ona faavae se aiga i lenei olaga ma tausia fanau. Peitai, o totonu o le Ekalesia e te maua ai le fesoasoani lena e te manaomia.

O le lalolagi e le o se nofoaga manaia e ola ai, ma o loo i ai luitau ma faama'i ma mamano o le olaga ma le oti ma faafitauli uma lava e oo mai ia i tatou, ae o loo maua tali i le malamalama ai o le aiga o le iunite faavae lea o le Ekalesia. O gaoioiga uma lava a le Ekalesia, ua fuafuaina e faamalolosi ai le aiga.

Fesoasoani mo Aiga

O nisi taimi atonu tatou te se ese ai mai lo tatou tulaga o le lagolagoina o aiga, i le aveva ma matafaioi a aiga le lagolago o le Ekalesia. E ao i taitai o le lotoifale [uarota/siteki] ona faaeteete i le faatulagaina o gaoioiga ma polokalama a le Ekalesia e aumaia ai i luma alii talavou ma tamaitai talavou, ma saunia ai i latou mo le olaga faaipopo, ona fesoasoani ai lea ia i latou i le

pōpōfou o o latou olaga faito'alua ma faasolo atu ai i le matua o le soifua.

Ua ou iloa o le matua o le soifua o se aafiaga malie. Sa ou manatunatu i mamano o le alofa ma mafutaga faaleaiga, le alofa molipo o le talavou. Pe te mauaina ea lena mea? Oi, ioe. E le gata ina te mauaina ae e viia foi ma faateleina.

Ia, ua le faigofie ona faavaeina se aiga i lenei olaga ma tausia se fanau. Peitai, e faigofie i le Ekalesia, e te maua ai le fesoasoani o loo e manaomia.

Ua tatou iloa ona tatalo, ua tatou iloa aoao atu, ae e i ai taimi tatou te manaomia ai le fesoasoani. O taimi uma lava, i nofoaga uma, o loo i ai se taitai perisitua. Ua aoaoina i tatou i mamano o faaaliga ma ua iloa e i ai faaaliga mo le tagata lava ia. A tatou le mautonu, e mafai ona tatou liliu atu i taitai o le perisitua. Ma afai tatou te

mulimuli ia i latou, o le a tatou saogalemu i le olaga i nei ona po, faatasi ai ma a tatou fanau ma a latou fanau.

O le taimi nei i lo matou aiga, ua i ai fanau a le ma fanau ma fanau a a latou fanau, ma o loo manaomia lava le liliu atu i taitai o le perisitua, e faia mea e masani ona faamoemoe tatou te faia i le Ekalesia. Peitai, e i ai taimi o luitau ma faigata ma tulaga matautia ma mea foi e le fiafia ai, ae o le pui-puia o le aiga, o le mea lena na ala ai ona i ai le Ekalesia, ma ua i ai foi le taitaiga faaleperisitua, o le mana ua i ai i soo se vaega o le lalolagi, o atunuu uma ua i ai le Ekalesia—o tamalii ua faauuina i le perisitua ma tamaitai atamamai ma mataalofa, ua i ai uiga tau-saafia faatina.

Ina ua tuua e le ma fanau lo matou aiga ae malaga atu i se mea mamao ma atiina ae ai so latou aiga i se aai mamao, sa ma vaavaai atu i lo latou malaga ese atu, ma sa i ai le mafanafana i le iloa o le a i ai so latou aiga iina. Ma sa ma ta'u atu i le ma fanau i le tele o taimi, "O le a le mafai ona outou telefoni soo mai ona o le tau-gata. Ae o le a i ai so outou tinamatua iina. O fea tou te maua ai se tinamatua? I le Aualofa. Ma o le a i ai se fautuaga poto ma mafai ai ona outou maua le malosi lava lea e tasi na outou maua i totonu o lo outou lava aiga. Ma a outou o, o le a faalateleina ai le lio faaleaiga."

Afai nei la tou te faafofoga i aoaoga o le a aumaia i lenei sauniga, o le a outou silafia ai e i ai musumusuga ma le taitaiga. Ia silafia foi, ina ua tatou papatiso i le Ekalesia a Iesu Keriso o le Au Paia o Aso e Gata Ai, e i ai le isi sauniga e ese mai le papatisoga, lea e

faaee atu ai le Agaga Paia. E tuu e uso o i ai le pule o latou lima i luga o le ulu o le tagata, o tagata taitoatasi ua papatisoina, ma faaee atu i o latou luga lena meaalofa, ma e ao ona avea ma se malamalama ma se faiaoga ma se e faasa’oina ma se taiala a o tatou ola ai i le olaga.

Taitaiga ma Faamanuiaga

Ou te le manatu e moomia e tagata o le Ekalesia ona ola ma le fefefe, i le vaai atu i mea uma o loo tutupu mai ma faapea, “E mafai faapefea ona tatou tausia se aiga a o lenei e fetaomi mai nei tofotofoga ma faigata?”

Ia, tou te mafaia, aua e mafai ona taialina outou ma e mafai ona outou aoaoina a outou fanau ina ia taialina. O na mea uma, e mafai ona outou soifua i se soifuaga fiafia ma maua i le taunuuga atoatoa o nei mea uma, i le isi olaga, e mafai ona faatasia le aiga.

Ia, o nisi foi taimi e i ai i latou ua leiloloa. Ua ia i tatou le folafolaga a perofeta, e le o leiloloa i latou e faava-vau, afai ua faamauina i latou i sauniga o le malumalu ma afai o tausisia fea-gaiga, e oo mai le taimi, pe a maea faa-sa’oga uma e tatau ona faia, o le a le toe leiloloa i latou.

O lea ou te tuuina atu ai a’u faamanuiaga ia te outou uma i le Ekalesia atoa, a o outou sapi i le olaga faale-aiga, pe o ni matua po o ni fanau po o se isi lava mamanu, ina ia faamanuia-ina outou ma malutia, ia i ai le mana o le Agaga Paia i o outou soifua ma ia iai pea le mana taiala o le perisitua e faasa’osa’o ai outou, e faamanuia ai outou, e faamalosiua ai outou, ma faamautu ia te outou se molimau.

O Le Atua o Lo Tatou Tama!

Ou te iloa o loo soifua le Atua, o Ia o lo tatou Tama, ma o Ia o lo tatou Tama! Ou te faalē iloa lelei pe faapefea ona ta’u lena upu. O se upu ua toetoe lava a tatou ta’ua faasamasama. Peitai o Ia o lo tatou Tama; e alofa o Ia ia te i tatou. Ma i lena foi mamanu, o i matou o loo taitaia le Ekalesia e i ai foi lena lava lagona mo i latou uma o tagata o le Ekalesia, ma i latou uma e ono avea ai. O lea ou te talosagaina ai faamanuiaga a le Alii i luga o outou uma, ma faamanuiaga a le Tama i luga o outou uma o tagata o le Ekalesia, a o tatou feagai ma le tiutetauave o le tausiga o se fanau amio-tonu, i le suafa o Iesu Keriso, amene.

FAAMATALAGA

1. “O Le Aiga: O Se Folafolaga i le Lalolagi,” *Liabona*, Ian. 1996, 122–23. O le uluai poloaiga na tuuina atu ia Atamu ma Eva o le fanafanau ia uluola ma faatumu ai le lalolagi. E faaauau pea lava lena mamanu i le talafaasolopito o tagata soifua uma. E le faigofie ona faavae se aiga i lenei olaga ma tausia fanau. Peitai, o totonu o le Ekalesia e te maua ai le fesoasoani lena e te manaomia.

Faatalatalanoaga

ELDER DALLIN H. OAKS

O Le Korama a Aposetolo e
Toasefululua



ELDER JEFFREY R. HOLLAND

O Le Korama a Aposetolo e
Toasefululua



JULIE B. BECK

Peresitene Aoao o le Aualofa



SUSAN W. TANNER

Peresitene Aoao o Tamaitai Talavou



CHERYL C. LANT

Peresitene Aoao o le Peraimeri

O Le Fuafuaga a Le Foafoa

Elder Holland

Ua matou fialia tele i le faatasi mai o Elder Dallin H. Oaks o le Korama a Aposetolo e Toasefululua; o Sister Julie Beck, peresitene aoao o le Aualofa; Sister Susan Tanner, peresitene aoao o Tamaitai Talavou; ma Sister Cheryl Lant, peresitene aoao o le Peraimeri. Ua agalelei mai nei taitai e valaaulia au matou te faatasi ma i latou i le laulau ma ua talo-saga mai ou te faafoea lenei talanoaga.

E i ai se faaupuga i le folafolaga i le lalolagi e faapea, “O le faaiipoipoga i le va o le alii ma le tamaitai e taua i Lana fuafuaga e faavavau.”¹ A tatou talanoa i le faaiipoipoga ma le aiga i le Ekalesia, aisea tatou te tuuina ai i totonu o le fuafuaga a le Atua? O le gagana lena tatou te faaaogaina; o le gagana e le masalomia lo tatou faaaogaina iinei i lenei afiafi. Aisea tatou te tuu ai i le faavavau ma le ata atoa o le faaolataga?

Elder Oaks

O loo ta’u mai ia i tatou i totonu o le folafolaga i le aiga e faapea o le “aiga o le totonugalemu lea o le fuafuaga a Le Foafoa, mo le taunuuga e faavavau o Lana fanau.” O le uiga o lenei mea o a tatou faaiuga ma manaoga i le faaiipoipoga ma le fanauina ma le tausiga o fanau e faavavau le taua. E tataua ona taitai tatou e poloaiga a le Atua ma aoaoga a Ana auauna, ae le o aganuulauilao po o le sa’o o upufai. Ou te manatu o le savali ma le faamoemoeaga autu lena e ao ona tatou manatuina i lo tatou talanoa atu i tagata matutua uma o le Ekalesia i lenei faasalalauga taua.

Elder Holland

Lelei. Tuafafine, pe i ai se manatu i le fuafuaga faavavau o nei mea uma, aisea ua le pei ai tatou o se isi faalapotopotoga po o se vaega lautele e tali atu i manaoga o tagata? Pe i ai ni manatu?

O Se Tautinoga e Tafatolu

Sister Tanner

Ou te manatu o le faaiipoipoga o se tautinoga—ma o se tautinoga ou te manatu e le o iloa e le lalolagi atoa—o se tautinoga e tafatolu. E fetautinoai tane ma ava, ae latou te matuai mautinoia foi lava lo tatou tautino atu i lo tatou Tama o i le Lagi. O le malosiaga o loo noatia ai lenei faaiipoipoga o le alofa, le alofa mama o Keriso. A o tatou mauaina lenei alofa mo le tasi, e le gata e tosina ai le tasi i le isi, ae tatou te latalata ai i lo tatou Tama o i le Lagi, ma latalata ai le tasi i le isi i le mafutaga faalefaaiipoipoga.

Elder Holland

E uiga i lena tamai tafatolu na e tusia i ou lima, o loo i ai la tatou faamamafa faapitoa i le taumafai e aumai le lagi i le aiga, taumafai e aumai le Atua i se faaiipoipoga. Pe i ai se fautuaga mo uso ma tuafafine, o e talavou pe matutua, o e o loo taumafai e fai lena mea? Pe i ai se lagona?

Sister Lant

O le manatu ua oo mai i lo’u mafaufau e faapea, afai tatou te talanoa e uiga i lenei aiga e faavavau, tatou te le o talanoa i se aiga ua atoatoa; o loo tatou talanoa i se aiga o loo taumafai ia atoatoa ma pe a toe foi atu i lo tatou Tama o i le Lagi. Ma afai la e te aumaia i lena fuafuaga le aitia lenei

o se tafatolu, faatasi ai ma lo tatou Tama o i le Lagi o loo fesoasoani ia i tatou i luitau o le olaga, ia te au, o se aiga atoatoa lena i le olaga lenei. E le faapea e i ai se aiga e leai ni luitau, ae o se aiga e i ai luitau ma galulue agai atu i le foiaina o luitau faatasi ai ma le fesoasoani a lo tatou Tama oi le Lagi.

Sister Beck

Ou te fia faia se upu i tamaitai o e ua tuulafoaiina po o le a lava le mafuaaga—ua tuua na o ia e se tane—pe ua maluu le tane. E toatele o tatou tamaitai o e faatuatua ma faamaoni aiai, ua tautino i le fuafuaga atoa ina ua faamauina i latou, ae ua tuua nei na o i latou. Ou te iloa le toatele o nei tamaitai faamaoni o e na faapea mai, “Ua lelei. Sa ou tautino i le fuafuaga, ma ou te le faamaamulu lava ona ua na o au. O le a ou faia pea tatalo faaleaiga. O le a ou faia pea suesuega i tusitusiga paia. O le a faia foi afiafi faaleaiga. O le a matou aoao i lenei aiga. O le a matou tali atu i manaoga o lenei aiga e tusa ai ma le fuafuaga a le Alii.” Ou te viia ma faamamalu na tamaitai totoa. Latou te le lafoaia le fuafuaga ona ua na o latou. E faigata atu pe a na o oe, ae e mafai lava ona e faia.

Elder Oaks

E lei fai mai le Alii ia i tatou o le a faigofie, ae ua Ia faamautinoia mai o le a mafai.

O Le Tutotonu o le Aiga

Sister Beck

Tatou te fesili pe aisea ua avea ai le aiga ma totonugalemu o le fuafuaga a le Foafoa? E faapefea ona tatou iloa lena mea? Ua tatou iloa mai faaliga na tuuina atu i perofeta e faapea sa tatou

nonofo i le lagi ae tatou te lei fananau mai, lea sa tatou auai ai i se taua tele i le muai olaga mo le avanoa e avea ai ma se vaega o le aiga faavavau.

E i ai se iunite faaleaiga e faavavau, ma o le fuafuaga atoa lea. Ona fetau lelei lea o isi mea uma i lena fuafuaga.

Elder Holland

Atonu e i ai ni uarota ma ni siteki i le lagi—ou te le iloa ma se mea e uiga i ai—ma atonu e i ai isi faalapotopotoga tatou te le iloa. O le mea ua tatou iloa o le a i ai i le lagi, o aiga. O le tele o mea ua faaali mai e uiga i lo tatou olaga pe a mavae le oti, lo tatou olaga e faavavau, lo tatou olaga faaselesitila, e taulai uma atu i le faalapotopotoga o le aiga, o le mea lena e maualuluga ai mataupu faavae o le malumalu, ma feagaiga tatou te osia ai iina.

Matou te faamoemoe e fesoasoani lea i tagata o le Ekalesia ma tagata e le auai i le Ekalesia ia iloa ai le pogai tatou te talanoa soo ai i ai.

Elder Oaks

O le tele o mea tatou te mafaufau i ai i le olaga nei—paoa, lauiloa, meototino, tulaga—o mea e le o ia i tatou se faamaoniga o le a i ai se eseese ga i le olaga a sau. Ae o le aiga e i ai.

Lotogatasi ma le Le Manatu Faapito i le Faaipoipoga

Elder Holland

O le a tatou agai atu loa i se faatala-talanoaga e uiga i le aiga, e uiga i fanau ma le fanauina o i latou, tausia o i latou ma le alofaina o i latou ma fesoasoani ia avea i latou ma tagata e tatau ona i ai, ae tatou te lei faia, e a ni mea patino o le faaipoipoga?



E faapefea ona tatou galulue i le faaipoipoga ina ia maua ai le siosiomaga lea tatou te mananao e fanauina ma tausia ai ni fanau?

Sister Lant

Na e saunoa pe faapefea ona tatou taunuu atu i le tulaga ua tatou saunia ai e faia se aiga ma aumaia fanau i le lalolagi. E tatau ona i ai lena faavae faaleagaga, lena lotogatasi i sini ma talitonuga i le va o le tane ma le ava e uiga i mea la te mananao ia i ai i lo la fale ma lo la aiga ina ia faamanuiaina ai.

Sister Beck

O se tasi o aoaoga faigofie i le auala e faia ai lenei mea o loo maua i le Kenese, mataupu e 2, lea na fetalai mai ai le Alii e faapea e tuua e le tane lona tama ma lona tina ae pipii atu i lana ava ma avea ai i laua ma tino e tasi (tagai Kenese 2:24). O ni tofiga na se tolu o loo i ai le aia a le ulugalii i le amataga lava: latou te tuua nofoaga sa i ai, latou te nonofo faatasi, ma ia tasi. Afai latou te galulue i na mataupu faavae e tolu, ona latou amataina lea ona atiina ae lena sootaga ma le Alii.

Elder Oaks

Ou te fia faamatalaina se ulugalii talavou o e ua faaipoipoina, ma i le la mafutaga faaleulugalii, sa tatau ai ona vaai muamua atu ai le tasi i le isi, e pei ona sa la faia i le fata faitaulaga i le taimi o le la faaipoipoga—ae le o le vaai muamua i o la matua, e le o le vaai muamua i o la tei, e le o le vaai muamua i a la uo, ae i le foiaina o o la faafitauli uma, sa tatau ai ona la vaai muamua atu le tasi i le isi, aua o le lotogatasi i lo la va i lalo o le pulefaamalumu alofa a se Tama Faalelagi i lena tafatolu na e saunoa muamua i ai o le mea lena o le a faasaoina mai ai i laua mai faafitauli ogaoga o le faaipoipoga.

Sister Tanner

Ou te fia mafaufau i lenei tala mua, lenei uluai tala o le alofa o Atamu ma Eva. Ina ua foafoaina Atamu, na tuu atu i ai e le Alii mea uma lava. Na Ia tuuina atu ia te ia se lalolagi matagofie. Sa ia faia fugalaaui ma meaola ma lenei faatoaga matagofie e nofo ai. Ae sa le mafai ona alualu i luma ia Atamu. Sa le alualu i luma le tagata seiloga e i ai sona fesoasoani, se tagata e fetau mo ia i mea uma, i auala faalelagona, i auala faaleagaga, ma auala faaletino.

Ua tau mai ai iina ia i tatou e uiga i le ituaiga mafutaga e tatau ona tatou maua i se faaipoipoga lelei. E moomia ona fetau le isi i le tasi. E moomia ona tatou mafaufau po o a mea e mafai ona tatou faia e fesoasoani ai i lena mafutaga ina ia alualu i luma. E tofu aumaia e i tatou ia uiga masani ma patino i le faaipoipoga ma e tofu i tatou uma ma misiona e faatinoina i faaipoipoga. Ae tatou te manaomia

foi ona tatou le manatu faapito i lena mafutaga ma fesoasoani le tasi i le isi.

Elder Holland

Sa ou faalogo o fai mai Peresitene Hinckley masalo o le manatu faapito o le lui pito sili lea i se faaiipoipoga.² Pe i ai se fautuaga mo le Ekalesia e uiga i le galulue pea i lenei mea ma faapea ane, “Na faapefea mai lona aso?” nai lo le na ona faapea ane “Na faapefea mai lo’u aso?”

Sister Lant

Ua outou silafia, ua tele naua faamatalaga i le lalolagi i aso nei e uiga i le “pe ua ausia ea o’u manaoga?” ua outou faalogo soo i ai.

Elder Holland

Ioe, o *manaoga* o se upu tele naua.

Sister Lant

Ioe, “e lei ausia o’u manaoga.” Ma ou te manatu afai e mafai ona tatou oo i le tulaga tatou te mafaufau ai i manaoga o le isi tagata, *ua* ausia foi o tatou manaoga. O le ala sili e ausia ai o tatou manaoga o le tali atu lea i manaoga o le isi tagata.

Sister Tanner

Sa ou ola a’e i se aiga sa i ai se faaiipoipoga lelei lava, ae ou te manatua lava le tala a lo’u tina e fai mai soo ia te au, “E moomia le galue ina ia maua ai se faaiipoipoga lelei; e moomia ai taumafaiga faifaipea.” E lei faapea mai o ia e lei lelei le la ulugalii, ae o le uiga o lana faamatalaga e leai se aso e te le mafaufau ai pe faapefea ona e faamanuia lou toalua ma fesoasoani e ausia ona manaoga.

Filifilia o se Toalua

Sister Beck

E masani ona tatou faalogo o fai mai le autalavou matutua, “O lea e sue sau soa ma te tutusa.” Ma ua latou tuuese le faaiipoipoga ona e leai se tagata e tutusa lelei, o se soa tutusa e fai ma latou uo sili e faavavau. O le a tonu le mea e tatau ona latou sueina pe afai o loo latou saili i faamanuiaga a le Alii ma faia se aiga e faavavau? E faapefea ona latou faia lena mea?

Elder Oaks

Ou te le talitonu lava pe a ou faalogo o faatalitali se isi mo le tagata na fuafuaina mo ia i le lagi. Atonu e i ai tulaga faapena. Ae ou te manatu o le toatele o tatou o loo sue se tagata tatou te alolofa i ai, o se tasi e mafai ona tatou tutu faatasi ma agai i luma, o se tasi e tutusa manatu ma mataupu faavae e faia ai se aiga e faavavau. Ou te manatu o le lagona faapea o loo e faatalitali seiloga e pa se mea i lou ulu ona faapea lea “o lea la” e na o le tolopo ai o faaiipoipoga ma o nisi taimi e le oo ai lava.

Elder Holland

Ou te manatu ua tatou faalogo uma lava i faamatalaga pei o le “Sei uma la’u aoga ona ou faaiipoipo lea” pe “E fia maua sa’u galuega” po o le “E fia teu sina tupe i le faletupe” po o le “E moomia se ta taavale.” Ua amata ona tatou faalogo ina, le faateleina i le lalolagi o na ituaiga faaupuga. Matou te mananao ia faatulaga lelei mea uma.

Ou te fiafia i le uiga o le alofa na tau mai e James Thurber i aso la. Fai mai o ia, “O le alofa o mea ia lua te ola faatasi i ai.”³

Ia te outou le autalavou matutua nofofua—e le tatau ona outou misia ia noataga na e fusia ai ma aafiaga na e fesooteai faatasi ai i tatou i lo tatou talavou ma o tatou faigata ma a tatou osigataulaga faapea ma tausaga ua matutua pe afai ua tele teisi a outou tupe.

Elder Oaks

Ia manatua o loo i ai se Tama Faalelagi iina, ma afai tatou te faia mea ua Ia fetalai mai tatou te faia, o le a Ia faamanuiaina i tatou. Aua tatou te taofia o Ia mai le faataunuaina o Ana folafolaga i lo tatou faia uma lea e i tatou e pei lava na o tatou na faia.

Sister Lant

O le taimi foi lea, tatou te le manao e uunai tagata talavou e nofonofo ai i tulaga maualalo—o lea ou te talanoa e uiga i faatulagaga a le Ekalesia. E le tatau ona latou faamoemoe e faaiipoipo i se tasi e le tutu faatasi ma i latou i le talalelei ma auauna atu i le Alii.

Aua le Ola ma le Popole

Sister Tanner

Ou te manatu o le faaiipoipo, ma faia ni aiga, o le faamaoni ma le ositaulaga mo le talalelei e fiafia uma lava. E aumaia ai le fiafia moni i o tatou olaga. E moomia ona tatou manatua lena mea ma ia faamamafaina. O le olaga faaleaiga o se faamanuiaga tele ia i tatou.

Elder Holland

O mea uma o loo tutupu, i le lalolagi ma soo se mea lava, ou te manatu o loo tele le popole o loo faaalua. Ou te faalogo i le tele o le popole i talavou

nofofua ma le tupulaga o tuufesili pe faamata e i ai se lumanai: “Faamata o le a umi ona ou ola ina ia ou faaipoipo?”

Faalogo, sa faigata lava. E lei i ai lava se taimi i le talafaasolopito e lei i ai ni faafitauli, pe lei i ai ni mea e popole ai. O le pogai lena ua tatou maua ai le talalelei. E le mafai ona tatou ola ma le popole—e le i ai i lenei Ekalesia—e faapea e i ai nisi o mea o le a le taunuu pe ua tele naua mea o loo tutupu lea e ono osofai mai. E moomia lo tatou ola ai i le talalelei ma ia maua lo tatou faatuatua ma maua mai tali i a tatou tatalo ma o i luma. O le mea lava lena sa sau ai.

Elder Oaks

Afai e mafai ona ou toe faaupuina se mau, “O le alofa atoatoa [o le Alii] e aveese ai le fefe” (1 Ioane 4:18; tagai foi Moronae 8:16).

Paaga Tutusa

Elder Oaks

Sei ou tuuina atu lava se fesili e faatatau i le mea lenei. Ua ou faalogo i ni talavou o mafaufau e faaipoipo o faapea mai i a latou faamasaniga, “Afai e mafai ona ta faia se lisi o mea o le a e faia ma mea o le a ou faia, o tuutuuga la o lena lisi, o le a ta maua ai se faaipoipoga fiafia.” E a la lena?

Sister Beck

E le o se lisi. E suia le lisi. E alu ma sau i aso uma.

Sister Tanner

O loo i ai se upusii matagofie mai le tusitala o John Milton, i lana solo faamamai o le *Parataiso Leiloa*. O loo viia ai e Atamu ia Eva mo “na galuega

lelei e fia afe e sau mai ana upu i aso uma e milo faatasi ma le Alofa.”⁴ O se mea matagofie le mafai ona tatou maua ni mafutaga e faatumulia i upu lelei i aso uma, lea tatou te mafaufau ai i mea e mafai ona tatou faia e ala i upu ma mea e fai e faailoa atu ai le alofa.

Sister Lant

Tou te silafia e tatau ona i ai se vaega o le galue i le faaipoipoga, aua e le mafai ona e fai toatasia. Ae sa tupu ia te au—ia, na matuai manino lava—lea vaega o le galue mo ulugalii talavou i aso nei e ese mai nai lo le taimi na ou faatoa faaipoipo ai. Ou te mata'ia ulugalii talavou o lo'u aiga—la'u fanau ma o latou taitoalua—ma le auala latou te faia ai mea i o latou aiga. E ese nai lo le mea na ma faia ai. Ae latou te fai lava le galuega. Latou te galulue faatasi i se faiga ese. O le tele o itu, e sili atu nai lo le ma faiga. O le manatu la, o le tagata lava ia. E soalau-pule le ulugalii i auala o le a latou faia ai galuega.

Elder Holland

Ua ou toe manatua ai le folafolaga, lea o loo talanoa mai ai i paaga tutusa. E le na ona tatou faapea atu, “O oe lava ia o le faafailele ae o au lava ia e nafa ma mea tautupe po o le a lava.” O le a fesuisuia fetuunaiga. O loo i ai se paleni iina. Ae e tatau ona tatou i ai faatasi. E tatau ona tatou fefaasoai ai. E foliga mai ia te au o le mea lena o loo fai mai ai le folafolaga.

O le isi laina mai le folafolaga o le, “E maua le fiafia i le olaga faaleaiga pe a faavae i aoaoga a le Alii o Iesu Keriso.” O loo fai mai ia te au, “E tatau

ona faalelei muamua ou sese ona ou popole ai lea i sese o isi.”

Elder Oaks

Ou te manatu o se faaalua lena o le aoaoga a Iesu ina ua Ia fetalai, aua le taumafai e eu ese le fasilaau o i le mata o le isi ae vaai le utupoto o loo i lou lava mata (tagai Mataio 7:3–5; Luka 6:41–42; 3 Nifae 14:3–5).

Aganuu a le Au Paia o Aso e Gata Ai

Sister Beck

E mafai ona ou mafaufau i se faataitaiga o nisi o au uo o e na liliu mai i le Ekalesia, ma sa leai se lotogatasi ma ni faataitaiga faaKeriso faapenei i le la aganuu ma le aiga. Sa le o se vaega o o la tupuaga. Ae ua auai i laua i le Ekalesia ma talia aoaoga a le Faaola, ma sa faapea mai ina ua la faaipoipo, “O le a faapei le aganuu a lo maua aiga? O le a le ma aganuu o le a i ai?” Ma sa la fuafuaina ma le totoa, “O le a ma mauaina se aganuu o le Au Paia o Aso e Gata Ai.” Sa la suesue i tusitusiga paia; aoa o aoaoga faavae, ma fesili, “O a foliga e tatau ona i ai i lo ma aiga ina ia ogatasi ai ma mea ua ma iloa e moni?” Sa la fausia lo la aiga i na mataupu faavae faaKeriso na outou ta'ua. O le a le aoaoga a le Faaola? E faapefea ona tausua e le tasi le isi? Uiga lelei, agalelei, faaaloalo.

Ma i le tele ma le tele o tausaga, ua tatou matauina le agai i luma o lena aiga. E le o ia i laua le aganuu a le la atunuu. Ua la maua le aganuu o le talalelei i lo la aiga.

Elder Oaks

Ma o se faavae sili mamao atu lena ona lelei mo se faaipoipoga—o se aga-



O nei matafaioi paia, e ao i tama ma tina ona fesoasoani le tasi i le isi o se paaga tutusa.

nuu a le Au Paia o Aso e Gata Ai—nai lo se lisi o galuega.

Sister Lant

Sa ma tauina atu i le ma fanau i le gasologa o tausaga ina ua faaipopo e faapea e le faataata po o ai e sao; ae o le a le mea sao. E tofu i latou ma tu ma aga latou te o mai ma i latou mai aiga na latou o mai ai, ma e te faamoe-moe a o latou aumaia faatasi na aganu, o le a latou vaavaai atu i ai po o a mea e sao—vaavaai i mataupu faavae o le talalelei e fuafua ai—ona sili mamao atu lea o lo latou lelei nai lo le mea sa i ai o latou aiga. O le a matuai malosi lo latou aiga; o le a sili atu foi le lelei.

Tausia o Fanau i le Faatuatua

Elder Holland

Sister Tanner, na e ta'ua Atamu ma Eva. Ou te matua faafetai lava mo le mataupu e lua o le 2 Nifae i le Tusi a Mamona, lea o loo faamatala atili mai ai le filifiliga na faia e Atamu ma Eva, nai lo nisi lava mea ua mafai ona iloa e se tagata.

Ou te manatu e le iloa e le toatele o le lalolagi lena mea. Ua ia i tatou se aoaoga faavae taua, le manatu o le fuafuaga e faavavau ma le totonugalemu o le aiga, le manatu lea sa aumaia e outou uma e uiga i le fuafuaga.

Sister Tanner

Ou te lagona ua faamanuiaina tele i tatou i le i ai o le folafolaga i le aiga. E mafai ona tatou vaavaai atu i leni tusiga e toetoe lava o se tusitusiga paia aua na auala mai i perofeta ma aposetolo soifua. O loo faamanatu mai i totonu ia i tatou e faapea o le poloaiga na tuuina atu e le Atua ia Atamu ma Eva o se tane ma se ava ina ia fanafanau ma uluuluola ma ia faatuuina ai le lalolagi o loo tumau pea ona faamalositia.

Ou te manatua a o ou talavou nofofua ma le popofou talu ona ou faaipopo sa ou faalogo ai i lena poloaiga o laugaina pea e aposetolo ma perofeta. Sa ou fiafia i lena fautuaga faifaipea. Ou te manatua sa latou aoao mai ina ia matou faaipopo, maua ni fanau, ma aoga, pei e fai uma i le taimi e tasi, e

ui e pei e faigata. Atonu e fai lava si faigata; ma ou te mautinoa e i ai tagata ua fesiligia ma mafaufau pe mafai faapefea.

Ao ou mafaufau i le faamalositia pea o leni poloaiga ina ia fanafanau, ua ou iloa ai e moni ma sao, ma ou te talitonu foi e manaomia ai lo tatou faatuatua tele ma le lototele ma e masani ona moomia ai le ositaulaga tele. E manaomia ai lo tatou ola ma faalogo i le Alii ina ia maua ai faaaliga patino, ma ou te manatu e manaomia ai se loto mama ina ia tatou le faamasino atu ai i isi o e o loo maua foi a latou faaaliga patino e uiga i lena poloaiga.

Elder Oaks

Ou te manatu o le saunoaga a Sister Tanner e moni ma e matuai taua tele. Faafetai mo lena saunoaga. Ua lamatia tatou i aso nei, e foliga mai ia te au, o loo saili o tatou tagata o le Ekalesia i mea e faamuamua i le lalolagi nai lo a latou filifiliga i le fanauina o fanau. Nai lo le faia o na filifiliga i le faatuatua i folafolaga a le Alii ma faalagolago i le mea ua tatou iloa o le fuafuaga sili o le fiafia ma le faamoe-moega o le olaga, a ua latou saili atu i isi auala—o televise po o aitu vavalo i le lalolagi i aso nei e oo foi i le faatosinaga a o latou tuaoi—ina ia faia faaiuga e taua ma faavavau ma e moomia ona faia ma le agaga tatalo i le Alii.

Sister Beck

Ou te manatu o se mataupu o le faatuatua. Ua tatou iloa le tele o nofoaga i le lalolagi ua le lava ia fale. E faapefea ona oulua maua se nofoaga e nonofo ai i le aveave ma se ulugalii faatoa faaipopo, e faapefea ona maua ni

fanau pe afai e leai se mea e te nofo ai? Tātou te le maua ni fanau ona ua i ai tupe, ma isi mea. Tātou te maua fanau i le faatuatua.

O le lagona ma le amio o le saili o faamanuiaga a le Alii i Lana fuafuaga, ou te talitonu, o le a maua ai vavega i olaga o tagata. Afai o loo e i ai i se tulaga ua tau leai ai ni fale, o le a tatalaina le auala e maua ai. E pei lava o le togoti o le sefuluai o se mataupu o le faatuatua, e faapena foi i le mauaina o fanau o se mataupu o le faatuatua. E te le togotia sefuluai i tupe; e te le maua se fanau i ni tupe.

Elder Oaks

E mafai ona matou faapoopo atu i ai i na mea e faapea o loo matou aoao atu mataupu faavae aoao ona o matou o Pulega Aoao ma taitai aoao.

Sister Tanner

Ou te fiafia i le faaupuga “e i ai le auala pe a tatou savavali i le faatua-tua.” E i ai sau molimau faapitoa e faapea e tatalaina auala pe a tatou faamaoni. Ina ua ma faatoa faaipoipo, sa tuu atu e le tama o lo’u toalua ia te ia se faamanuiaga e faapea, “Mulimuli i mataupu faavae o le talalelei—fai le mea ua e iloa e tatau ona fai i le faaipoipoga lenei ma savali i le faatua-tua—ma o le a tatala atu le auala, o auala e le o mafai ona e vaai i ai i le taimi lenei.”

O le savali i le faatuatua e le faapea o le savali le faeteete. E ao ona tatou atamamai i a tatou faaiuga ona matuai galulue malosi lea ma naunau e ositaulaga ma mafai ona ola e aunoa ma nisi o mea e maua. Na ma iloa ma lo’u toalua na faataunuaina le faamanuiaga a lona tama i o ma olaga. O auala sa

lei vaai muamua na tatalaina mai ia i ma’ua. Ma ou te iloa o se mataupu faavae moni lea mo soo se tasi e savali i le faatuatua.

Sister Lant

Sa e ta’ua le naunau e fai le galuega e manaomia mo le mauaina o fanau. O le mauaina o fanau o se galuega tele. Ma e le tatau ona tatou fefefe ai, aua o le ute lena o le galue malosi ma le naunau e fai soo se mea ua avea ai i tatou ma tagata ua tatou i ai. O le ositaulaga ua tatou faapenei ai. Ou te fia molimau atu i le olioli e sau mai le mauaina o aiga, ma le mauaina o fanau, aua e le gata o se poloaiga mai le Alii, ae e i ai foi faamanuiaga e tele ua folafolaina mai ai.

Elder Oaks

Ae ao foi ona tatou mafaufau i le mea moni e faapea i le tele o vaega o le lalolagi o loo i ai tagata o loo faafofoga mai i lenei faasalalauga, ua teena-ina ai le manatu o le mauaina o fanau. Po o le manatu e faapea afai ua i ai lau tama e tasi ua lava lea ma ua e faavalevaleyale pe palaai pe a tele atu nisi fanau. E tele manatu o loo i ai i le lalolagi e tetee atu ai i le fuafuaga o le talalelei. E pei ona fai mai le tama ia Liae, “[E] tatau ona i ai . . . le faafeagai o mea uma” (2 Nifae 2:11). E le mafai ona tatou faamoemoe e viia pea i tatou i taimi uma e fai ai se mea sao. Ae o le a faamanuia oe e le Atua.

O Manaoga o le Loto

Sister Beck

Ou te iloa le toatele o ulugalii e mananao i ni fanau ae ua le tuuina atu i ai lena faamanuiaga. O lo latou luitau o le le maua o ni fanau. E moomia

ona tatou faalogo ma fesoasoani ma faamalosi atu i ai. Ou te talitonu foi o le manao o tuafafine nofofua ma nei ulugalii mo ni fanau atonu o le a le tea ese pe afai latou te amiotonu, aua o se manao mai le Atua. E talanoa atu i o latou lava natura ma le aoaoga sa latou maua i le lagi. O le a le aluese le momoo. Ae o le a faamanuia i latou e le Alii.

Elder Oaks

O le a manatulia lena momoo i le Faamasinoga Mulimuli. O se tasi o mau e sili ona faamafanafana loto o loo i le vaega e 137 o le Mataupu Faavae ma Feagaiga, fuaiupu 9, lea o loo tau mai ai ia i tatou e faapea o le a faamasinoina i tatou e le Alii e tusa ma a tatou galuega ma manaoga o o tatou loto.

O Le Aiga e Faamuamua

Elder Holland

Sei o tatou talanoa i le poloaiga o le tausiana o fanau, pe o le a le mea e sosoo ai ma le faataunuaina o le poloaiga ina ia fanauina fanau ma faaauau ai pea i lo latou alualu i luma e faavavau i le tuuina atu lea ia i latou o le avanoa faaletino. E le faapea e le fesootai na tiute. E foliga mai ia te au o le poloaiga a le Alii e le na o le maua o fanau, ae ia tausia ma le manatu o le a tatou laveaiina i latou.

Elder Oaks

A o tatou talanoa i lenei mea, o le a le uiga o le faamuamua le aiga? Tatou te faia lena faaupuga, ma e tatou te talitonu i ai, ae o le a le uiga o le faamuamua le aiga?

Ou te fia faaogaina lau tioata e manatua ai se faatusatusaga mai ia

Neal Maxwell. Sa fautua mai i se isi mataupu e faapea tatou te tusia se mea i totonu o a tatou tioata ma soo se taimi tatou te vaai ai i se mataupu, tatou te vaaia ai lena savali. E faapena foi, e mafai ona tatou faapea ane pe a tatou vaavaai i filifiliga pe faapefea ona faaaoga e le aiga o latou taimi po o faaiuga i auala o le a fuafuaina ai e le uarota ana gaioioiga, ua tatou tusia i totonu o a tatou tioata, “E muamua le aiga.”

Elder Holland

Ou te fiafia—tatou te fiafia uma lava—i upu mai le Failauga, “O le mea ma lona tausaga i mea uma, ma ona lava po i mea uma i lalo o le lagi” (Failauga 3:1). E utiuti o tatou taimi, ae tutusa lava le tele. Ou te manatu la a tatou faia mea e ao ona faamuamua, e mafai ona tatou faamuamua le aiga.

Ou te manatu e mafai ona tatou faia se galuega lelei.

Elder Oaks

Ma afai tatou te talanoa e faamuamua le aiga, e ao ona tatou mafaufau i mea e pei o tatalo faaleaiga ma afiafi faaleaiga ma sutesuga faaleaiga o tusitusiga paia ma ia i ai se taimi ma vaai o loo tutupu nei mea e faavavau o latou taunuuga i le tuputupu ae faaleagaga o a tatou fanau. O se faaaliga lena o le “faamuamua le aiga.”

Mamanu Faaleaiga

Elder Holland

Na ou folasia atu le upu *mamanu* i a'u upu tomua ina ua tatou amata. O nisi o nei mea lea atonu tatou le manatu mamafa i ai e le tatau ona manatu mama i ai, e pei o sutesuga faaleaiga o tusitusiga paia, e pei o

tatalo faaleaiga, e pei o afiafi faaleaiga—ua tatou matele e faapafala ese na mea e pei ua malamalama uma i ai tagata, ae latou te le o malamalama i ai. E ao ona avea ma se mamanu faaleaiga.

Sister Tanner

E tasi se mea e i ai sona faamoemoega e uiga i mamanu aua e ui o nisi taimi e lagona ai lo tatou le atoatoa i le taumafai e faatuina nei mamanu, ae e matagofie ma faamalieina pe a vaaia a tatou fanau o faaauuina na



mamanu, e ui ina tatou te lei lagona-ina lo tatou atoatoa lelei ai.

Elder Holland

Sa aoga nisi o mea.

Sister Tanner

I se tulaga patino faaletagata, sa ta'ua ai e lo'u toalua e faapea, i le maliu o lona tama e leai se mea na te lei aoaoina mai le lotu na te lei iloa muamua mai le fale. O se faaaloaloga maoae lena i ona matua—o matua o se aiga toatele. Sa ia talanoa e uiga i nisi o taimi e faatasi uma ai tamaiti i le moega o matua, ona tuu lea e le tama se pola tuai o le potu ma tusi ai luga se siata e faailoa mai ai le ata o le faaolataga. Fai mai o ia, "Sa matou aoao i le ata o le faaolataga i le saofafai faatasi i le moega o o matou matua. Ma sa le gata sa matou aoaoina ai upumoni o le talalelei, ae sa matou o atu faatasi foi i tuafale ma taaalo ai i le taaloga e ta'u o le, 'E Leai ni Urosa i Lenei Po' po o isi taaloga o se aiga." Sa tele mea lelei sa fai e lenei aiga e faaaoga ai lo latou taimi e faatasitasi ai, e aoao ai, ma fatuina ai mea e manatuaina.

Elder Oaks

Ou te manatua se tulafono sa i ai i le matou aiga—e tofua aiga uma ma tulafono—matou te le kiina lava le televise pe a matou aai, aua na matou manatu o le taimi lenei e faatasitasi ai o se taimi mo talatalanoaga: "O a au mea sa fai ananei?" "O le a se mea o aveva ma faafitauli ia te oe?" "E mafai faapefea ona matou fesoasoani atu?" E le mafai ona tupu lena mea pe a faalavelave mai tala fou i le taimi o le meaai a le aiga, e tusa po o le a le taua. Ae sa i ai se matou tulafono o le leai se tele-



vise ae tele le talatalanoa, ma e matou te i ai uma lava i le fale mo le meaai o le afaifi. Sa le mafai ona matou faia uma i le ti o le taeao—sa faapena lava la matou faatulagaga—ae tasi le matou meaai matou te i ai uma lea matou te nonofo faatasi uma ai i lalo. Sa lelei tele lena mea mo lo matou aiga.

Sister Tanner

E tali tutusa o tatou aafiaga. Sa e saunoa e uiga i talatalanoaga ma le fusia faatasi o outou i lena talatalanoaga. E le gata e fusia faatasi ai ma e aoga, ae malie foi. E mafai ona outou talie faatasi, ma e mafai ona outou fefaasoai ai aafiaga ootia. E masani ona fai a matou tatalo faaleaiga i ti i le taeao ma meaai i le afaifi, aua matou te i ai uma mo na aiga e lua. O a matou tatalo faaleaiga e masani ona folasia mai ai autu o talatalanoaga i taimi o meaai. O isi taimi e tatalo ai lo'u toalua mo se tina matua o loo fai se taotoga. Pe tatalo foi mo tagata o loo mafatia i soo se mea i le lalolagi

mai se mafuie po o se isi mala faalenatura. Ma a o matou aai, ua i ai nei autu matagofie e talatalanoa faatasi ai i lenei taimi ina ia fusia ai i matou o se iunite faaleaiga.

Sister Beck

Sa ou ola ae i se aiga toatele. Sa toatele le fanau a ou matua. O lona uiga sa tele ni manatu faaalia. Sa tele foi ni galuega ina ia tausia ai lenei aiga. Sa faaaoga e o'u matua le meafai-galuega o afaifi faaleaiga e matuai aoao ai i matou. O vaiaso taitasi matou te usuina ai le pese "A i ai i le Aiga le Alofa" e aveva ma pese amata. Ou te manatua i lou talavou sa ou mafaufau ai ua ou le lava usu soo lea pese i vaiaso uma.

Elder Oaks

O isi taimi e usu lava lea pese ma le u o nifo.

Elder Holland

Ma o se tofiga.

Sister Lant

O nisi taimi o le tina e u nifo.

Sister Beck

Sa sili atu ona avea o se talitonuga nai lo se masani. Ae o vaiaso uma e fai mai ai Tāma, “O le a tatou usuina nei le pese amata, ‘A i ai i le Aiga o le Alofa.’” Ina ua 14 po o le 15 o ou tausaga, o le matua lena e te fesili ai lava i mea uma, sa ou fai atu ai i lo’u tama, “Aisea e usu soo ai lenei pese i vaiaso uma? E tele foi isi pese lelei o le tusi-pese e mafai ona tatou usuina.”

Sa tilotilo mai o ia ma le paū ma fai mai, “Sei e aoaoina le lesona 1, ona aoao atu lea o le lesona 2.” Ou te lei iloa po o le a le lesona 2; matou te lei faia lava, ae ou te faapea atu, ina ua mavae le gasologa o le tele o tausaga, sa ou vaavaai atu ai i lo’u aiga, ma sa matou iloa ai ona alofa le tasi i le isi. Sa matou aoaoina i le tele o tausaga ona alofa le tasi i le isi ona o le lesona 1 lena sa mananao o’u matua e aoao mai. Sa lei taumafai o’u matua e aoao mai mea uma. Sa la iloa, a amata i lena, o le a aoga.

Na sau ia te au se tasi tina talavou lelei lava. E toafa lana fanau e i lalo uma o le ono tausaga le matutua, ma sa ia faapea mai, “O loo matou faamaoni i le taumafai e fai a matou suesuega o tusitusiga paia i taeao uma, ae o le mala le mea. E i ai lava se isi e tagi; latou te le faalogo.” Sa ou fai atu, “O le a le umi e te taumafai ai e fai lenei mea?” Fai mai o ia, “O la matou sini e fai mo le 10 minute i aso uma.” I lo’u taumafai e tuumamaina lona popole, sa ou fai atu, “I lau vaega o loo i ai, masalo ua umi tele le 8 minute.” Sa malamalama o ia i le mamanu, ae e tatau ona fetuunai i le matutua o lana vaega. Atonu e mafai ona latou amata i se ata o Atamu ma Eva ma talanoa i

le ata ae aua le taumafai ia faitau e le lua tausaga le matua ia tusitusiga paia. Ae sa faamaoni o ia, ma ou te alofa ia te ia ona o lena mea.

Ae peitai, ou te talitonu e taua tele le faalogo o fanau laiti o faitau atu ia i latou ia tusitusiga paia. E tatau ona latou masani i le gagana a tusitusiga paia aua o le gagana lea a o latou matua.

Aua le Faamasino Atu i Isi

Sister Lant

Elder Holland, ou te fia fai atua lava se upu i le faamasino atu i isi tagata. Tatou te vaai i isi tagata, ma e le o taimi uma e moni ai mea e pei ona foliga mai ai. Tatou te manatu i se isi auala, ae le o le auala lava lena e i ai.

Sa i ai so matou aiga toatele, ae o lo’u toalua sa avea ma epikopo a o laiti uma lava tamaiti. Ou te galue i le Aso Toonai atoa ma le taeao atoa o le Aso Sa e sauni i latou mo le lotu, ma e ao ona ou vave momoliina i latou iina, a leai matou te le lolotu lava. E tumu



lelei le nofoa ia matou—na tumu le nofoa ogatotonu i le laina lona lua mai tua i le ma fanau—ma e matou te oo atu e lei amataina le lotu.

I se tasi aso, sa musumusumu mai se tasi uso. “Sister Lant, ana lelei faapena la’u fanau, ma ana faigofie mo au e pei o oe, semanu e toatele foi lo’u aiga.”

Ia, na amata ona ou tagi, ma e uma lava le sauniga o o’u tagi. Sa fai ma vaai mai lo’u toalua ia te au e pei e fesili mai “O le a le mea ua tupu? O le a le mea ua tupu?” Sa ou le mautonu. Sa ou ita aua sa le faigofie.

Tatou te matele e faamasino atu i isi. Tatou te faamasino ma le inainā. Pe tatou te faamasino sese foi pe a tatou vaai atu i isi ma le alofa. Ae tatou te matuai le mailoa tonu lava le tulaga o le isi tagata. Ia tau lava o le alofa o le tasi i le isi.

Elder Holland

Ma pipii i le aoaoga faavae, ia pipii i nei tulaga moni—o le a tatou aea lenei mauga i le ala sili tatou te iloa ona aea ai, ma o le a i ai taimi e fai ai si eseese mo aiga taitasi.

Galulue Faatasi

Elder Oaks

E i ai se isi vaega o lena aoaoga, o le luitauina lea o tama ina ia taulamua i le taitaiga. Fai mai le folafolaga i aiga o tama e taitaia. E tatau i tama ona faapopototo le aiga mo tatalo faaleaiga. O tama e tatau ona mautinoa o loo fai afiafi faaleaiga. O nisi taimi e sili ai le tuu atu i tina e fuafuaina; atonu e sili atu ai o ia i le tama. Ae o le a tali le tama i le Alii. O le mea lena tatou te faitau ai i le folafolaga, “e tatau ona pulefaamalumu tama.”

Tama, ia tulai ma faatino lau mata-faioi.

Elder Holland

Ua fetau lava foi ma o tatou manatu na muai folasia, i le tele o faatosinaga i le lalolagi lea e aveesea ai tagata mai le aiga. O le isi lea faataitiga o le taumafai e aumai tagata i le aiga, e aofia ai ma aemaise lava, matou te toe faapea atu, i tama.

Sister Lant

O tama e pulefaamalumalu, ma o tama e faapotopoto maia le aiga. Ae o tina e tatau ona lagolago atu i ai. E ao ona latou taumafai ia faapena ona potopoto mai o latou aiga ma faafai-gofeina ia avea o se aafiaga manaia.

Sister Beck

Afai tou te faatasitasi, pe a e iloa—e toe foi lava i tua i la tatou mataupu faavae i le amataga—o le aiga ua faauuina e le Atua ma ua tatou i ai faatasi i lenei mea, ona outou fuafua faatasi lea ma vaai ia tupu. Tou te fesoasoani faatasi ina ia tupu.

Sister Lant

Ma e ao i fanau iti ona naunau i ai. E ao foi i le tupulaga ona naunau e tali atu i ai.

Sister Beck

Ia, o nisi taimi latou te naunau ai.

Elder Oaks

E leai se galuega e faatauvaa.

Sister Lant

Ia faia pea. Ia faia pea lava.

O mataupu faavae sa tatou talanoa i ai, o nei mataupu faavae uma e uiga i le mea e tatau ona faavae ai le aiga, e faasino uma atu ai lava i tatou i le malumalu. Ou te manatu o le malumalu o se faamanuiaga sili lea i o tatou

olaga, e tusa lava pe ua o lo tatou aiga i le malumalu, pe o tatou faamoemoe mo se aiga e ulu atu i le malumalu. O nei mataupu faavae uma o le upumoni ma nei mamanu o le olaga faaleaiga e taualuga uma lava i faamanuiaga o le malumalu aua o iina lea e avea ai i tatou ma aiga e faavavau.

Na saunoa mai Elder Ballard ia i tatou e faapea “e manino, o i latou . . . ua tuuina i ai fanau pele, ua tuu i ai se tiute paia ma mamalu, aua o tatou ia ua tofia e le Atua e siomia fanau o aso nei i le alofa ma le afi o le faatuatua ma le malamalama po o ai i latou.”⁵ O le atoaga lena o le mea e ao ona tatou faia i le avea ai ma ni matua.

Aiga Lautele

Elder Holland

Ae a pe a tatou faia sina upu e uiga ia i latou o e e mafai ona fesoasoani atu i “aiga”—matua matutua, uso ma tuagane o matua, se tasi e le o atoatoa lona aiga mo se taimi. Sa tatou faailoa atu i le amataga e faapea e le o tagata uma o le a latou ausia lenei faatula-gaga, ae e mafai ona tatou tautino i lea tulaga; e mafai ona tatou tautino uma atu i le aoaoga faavae. Pe i ai ni finalo faaalii, pe mafai faapefea ona naunau ma fesoasoani mai isi i aiga?

Sister Lant

Ou te musu e mafaufau atu i le avea ai ma se tina i le leai ma se fesoasoani na ou mauaina mai soo se tasi. Ou te faafetai i tagata lelei o e na i ai aafiaga i la’u fanau. Ma e toatele i latou, o faiaoga, o tuaoi, o uo, o tau-soga lautele. E tele itu na fesoasoani ai tagata i la’u fanau. Ma e ou te faafetai tele ai mo lena mea. O se molimau

faapoopo lea i mea o loo ma taumafai e aoao ai i latou. O nisi taimi e le mafai ai ona e faia se uunaiga i se tasi o lau fanau, ae e mafai e se isi tagata.

E i ai nisi o la’u fanau e nonofo i atunuu i fafo. O la’u tama teine laitiiti e nonofo i Sepania ma lona toalua, ma sa fanau ai lana pepe muamua i Sepania. Sa mamao ese o ia mai ia Tinamatua, ma sa ou popole mo le tulaga lenei ma popole foi mo ia, ae sa avea le Au Paia lelei iina ma ona aiga. Sa latou i ai iina mo ia, ma sa latou fesoasoani ia te ia, ma sa latou siosiomia ma alolofa ia te ia ma alolofa i lena pepe. E maeu lou faafetai mo i latou ma le latou tausiga ma o latou aafiaga i lona olaga.

Elder Oaks

O le ola ae i se aiga e toatasi se matua ina ua mavae le maliu o lo’u tama ae toetiiti atoalo’u valu tausaga, na ou iloa muamua ai le uunaiga a matua o matua, o uunaiga o uso ma tuagane ma tuafafine o matua faapea ia tausoga. Sa ou fiafia i le vaai atu i le malosi o aiga lautele a o ou femalagaai ai i fafo atu o le Iunaite Setete.

Ou te manatu i le tele o vaega o le lalolagi o le faatulagaga o le aiga lautele ua malosi atu nai lo Amerika i Matu. Ou te uunaia o tatou tagata o le Ekalesia i Amerika i Matu ina ia mautinoa o loo latou aapa atu, faamalosi le aiga lautele, ma ia iloa o loo i ai nofoaga i le lalolagi o loo matuai lelei ai lena tulaga nai lo Amerika i Matu.

Aiga Faaleuaroa

Sister Beck

E i ai foi le aiga faaleuaroa. E pei ona ou taua, e te maua i uarota uma

ia aafiaga ma lui eseese. O nisi o na tamaitai o le a maua ni fanau; o nisi o le a faaipoipo; o nisi o le a maliliu a latou tane; o nisi o le a leai ni tane. O le mea moni lava e toalaiti ni tamaitai e mafai ona maua ni fanau toatele. I lena aiga faaleuaroa e ao ona tatou siosiomia ma lagolago i latou o e na valaaulia fanau i o latou aiga. O se lui le i ai o se aiga toatele. Ou te faamoe-moe e leai se isi o le Ekalesia e oo atu i se tasi uso i le uarota ma faapea atu, “Matuai e valea ma lou toe fanau,” ae ia fialia ma fai atu i ai, “ou te lagolago ina oe. Ou te faia mea uma e faamalosi ma fesoasoani atu ai ia te oe.”

Elder Oaks

Ou te fialia e tau atu o loo matou mauaina lipoti e faapea o loo faitioina e nisi o le Au Paia o Aso e Gata Ai ia isi Au Paia o Aso e Gata Ai ona o le fanauina o fanau. Ou te manatua i popofou o le ma faaipoipoga, sa ma'i ai June i le ma tama lona lima, sa fai atu ai se tuafafine malosi o le uarota ia te ia, “O le a le mea o loo e taumafai e fai, faatumu na o oe le lalolagi?” Ma sa oo mimita ia June ona o lana tali na toe tali vave atu i ai, “Ou te le iloa lava se isi tagata sili atu na te faia lena mea.”

Elder Holland

Ma e tatou te faailoa atu uma—e pei ona taua e Sister Tanner—e i ai faafitauli o le soifua maloloina lelei, o loo i ai mataupu e le o ni mea e fai ni tino. Matou te le o talanoa i tupe po o polokiki sa'o po o le eseese o tagata, o loo matou talanoa e uiga i mea tatau o loo matele i ai le talalelei lea matou te vaaia ma fuatiaina. O le mafuaaga tonu lea e aua ai le faamasino atu. Tatou te aoa atu, lagolago, ma faama-

losiau; i totonu o le talalelei tatou te uunaia tagata e sue lena faasinomaga e a latou.

Aua le Fiu

Sister Tanner

I le mataupu o le tausiga o fanau lea atonu e i ai tagata o loo i la tatou faapotopotoga o le a amata ona lagonaina le faanoanoa ia i latou lava. O le eseese e i le atoatoa ma le tulaga moni o le olaga i aso taitasi e foliga mai i nisi taimi e lofituina ai i tatou i le avea ai ma tama ma tina. Ae ou te iloa o le avea ma tina po o se tama o se tiute e faavavau, o se valaauga e faavavau, ma o lena valaauga, e pei ona i ai i soo se valaauga, ua faamanuiaina ai i tatou i se mana. Tatou te manaomia lena mana, ma e tatou te manaomia le agaga o lena mana ia mafuta ma i tatou e le aunoa a o tatou tausia a tatou fanau. O le mea moni, ou te mafaufau e pei lava i tatou o Elisaia, tatou te manaomia se faaluaina o lena agaga a o tatou tausia a tatou fanau (tagai 2 Tupu 2:9). Ou te iloa o le a faamanuiaina i tatou e le Tama Faalelagi i lena mana. O Ana fanau agaga nei ma o le a Ia faamanuia i tatou i le faaluaina o le agaga a o tatou saili e tausia i latou i le amiotonu.

Elder Oaks

Ma o isi e sili atu le faigata nai lo isi. E leai se mea e ta'u o le fai tutusa o tamaiti i le gauai atu faalematua pe o nisi o faaiuga masani e manaomia. Atonu tatou te tutusa i le vaevaeina o meatotino a o tatou filifili i ai pe le filifili foi i ai, ae ia tatou mautinoa e le mafai ona tutusa i le vaevaeina o le taimi aua e eseese manaoga.

Sister Beck

Sa ou vaai i se faataitaiga o le vaevaeina o le taimi i lo'u lava aiga na ou ola a'e ai. O lo'u uso matua e ulumatumua i le fanau e toa 10, sa logonoa i le lua o ona tausaga. Sa le mafai ona faapea atu lo'u tina, “E 10 minute i le tamaitiiti lea, 10 foi mo le isi.” O le tamaitai lea sa avea le tele o le taimi mo se taimi umi i totonu o le aiga.

Ou te manatu foi o le fesoasoani ma le mana mo se aiga ua faamau e faavavau e sau mai le malumalu. E pei lava o le tuuina atu o ki ma le pule ma le mana i se peresitene o le siteki, ma o loo i ai i se epikopo ia ki ma le pule e faatautaia ai lana uarota ma taitai ai iina, o matua i totonu o le malumalu e tuuina atu i ai le mana e maua ai tali, e maua ai faaaliga e foia ai mea la te moomia ona foia.

Elder Oaks

O se vaega o lena faaaliga o le iloa lea ua tuuina atu e le Atua ia i latou nei, o Ana fanau, le mana e filifili ai. Ma a oo i le taimi ua latou matutua ai o le a latou faia ia filifiliga ma o le a faamasinoina ai.

O se mea leaga pe a tauave e matua le tausialaga mo filifiliga uma sa faia e a latou fanau. Ia aua, aua, aua lava nei o tatou fiu. Ma o tatou e nafa ma le aoaoina o mataupu sao ma fai mea uma i le alofa ma le faatauanau. O nei mea uma o mataupu faavae o le perisitua mo le faaaogaina i le aiga e faapea foi i le taitaiga o le Ekalesia. Ae i le iloiloga mulimuli, ou te faapea atu ai i matua ua matutua ma matua o matua, ia tausisi pea i le tatalo, ia taumafai pea, ae ia tuuese lena avega mamafa o le tausialaina aua o tagata ua

tuu atu i ai le mana o filifiliga, o le a faia filifiliga sese. O nisi taimi e na o le pau le ala e mafai ai ona aoaoina nisi tagata o le fai lea o se filifiliga sese ma vaai i lona taunuuga. Ona tatou faalagolago lea i le mana maoae o le Togiola a lo tatou Alii ma le Faaola o Iesu Keriso. Ma e seāseā se agasala tatou te faia i le olaga nei, e tusa ai ma mataupu faavae sao, ona le faamagaloina i le mana o le Togiola a lo tatou Alii.

Fatuina o se Siosiomaga e Faafaileleina Ai

Sister Lant

Pe ua lava ea mea ua tatou taua e faatatau i le alofa o le tasi i le isi? Ua tele upu ua tatou faaaogaina e uiga i le auala e tata ai ona tatou aoaoina a tatou fanau ma mea e moomia ona tatou faia i o tatou aiga, ae ou te manatu e na ona tatou fealofani lava. Sa ou faalogo i le faamatalaga faapea e leai se mea e sili atu e mafai ona fai e se tama mo lana fanau nai lo le alofa i lo latou tina. E tutusa lava mo tagata uma o le aiga—ia saili moni ni auala e ta'u atu ai ma faali atu ai le alofa.

Elder Holland

O loo taumafai le Ekalesia e ave tagata i le fale, e aofia ai le Tama. O loo i ai se valaaulia i le Tama ma le Tina ina ia i ai uma i le fale i le tele o taimi e mafai ai.

E lei leva tele atu talu ona maliu le tama o lo'u toalua, ma sa faavauvau lava o ia i le ala e faavauvau ai se afafine i le maliu o se tama. Sa ou faamafanafana ia te ia, ma sa ia fai mai, "Sa alofa tele o ia ia te au. Na te usuina ni pese mo au. Na te ave au i lo'u

moega. Na te faamoe ia te au." Fai mai o ia, "Ou te le manatuaina se po na te lei ave ai au i lo'u moega ma usu se pese mo au." Ua ou tuuina atu se manatu e faatatau i tama, i le i ai lea o tama i le fale. Ou te faamalo i o'u atalii, ua lelei lava i latou i le suiga o napekini ma le ave o tamaiti i fafo i le taimi o le lotu.

Sister Lant

Ou te manatu o loo i ai se uunaiga tele i le lalolagi lea o loo taumafai e le gata e toso ese i tatou mai le fale, ae ia toso ese ai foi mai mea na e matuai taua lava. A o ou vaavaai atu i mea ia e aveeseina ai i tatou mai aiga, o nisi taimi ua tele naua, ae o nisi taimi ua tuuitiitia. Ae faatatau uma lava i mea faalelalolagi. Ou te manatu e matuai moomia lava ona tatou matuai vaai totoa i mea e ave i ai le faamuamua—Pe ua tatou pisi tele ea? Pe o tatou taumafai ea e fai ni mea se tele?—ma vaai i mea na e faia moni se eseese i olaga o a tatou fanau ma ia mauintoa e le o mea faaleagaga na tatou te tuu esea.

Sister Beck

Ou te le manatu e tele ni gaoioiga faaopoopo po o le taimi e muli-

muli ai i le fuafuaga a le Alii. E mafai lava ona fai i auala faigofie. Ou te manatu o se tasi o manatu taua mo matua ina ia taofimau e uiga i le aiga o le faia lea o se siosiomaga. E tele ina tatou fuaina mea i galuega, mea e ausia, mea e maua, po o lisi. Ae e mafai ona tatou mafaufau i se siosiomaga e mafai ona ola ai se mea. O le upu *faafailele* o lona uiga ia fesoa-soani e faatupu. E le ola se mea i se eleele matutu tele pe malulu tele pe malo tele. O le galuega a matua ia faia se siosiomaga e ola ai mea i le Agaga, e maua ai le faatuatua, faamoemoe ma le alofa.



Sa ou vaai i se tina lelei lava i Mekisiko. E laitiiti lava sona fasi fanua i fafo mai o le faitotoa o lona fale, ma sa ia valiina se ata o se togalaau i le puipui o le fale. Sa leai se fanua na te totoina ai se togalaau. Sa i ai se puipui o lona fale, ma sa ia valiina ai se faatoaga, o fugalaa, laau ma se vaipuna. Sa manao o ia e faia se siosiomaga mo le tausiga o lona aiga. O se manatu manaia tele le i ai o se nofoaga mo lona aiga e maua ai lona vaai.

Elder Oaks

Sa masani ona fiafia lo'u tina e sii mai upu a Pearl Buck, o le na fai mai, "Ou te alofa i la'u fanau ma lo'u loto atoa, ae le mafai ona ou alofa ia i latou i lo'u taimi atoa."⁶ Ma o lea sa matuai faaeteete ai lava o ia i si ona taimi utiuti ina ua le toe faigaluega. Sa faaeteete o ia i mea na matou faia i si taimi utiuti lea na matou maua matou te faatasia ai. Sa manao matou te galulue faatasi i galuega. Ou te toe tepa i tua i lona mea ma le lagona alofa tele nai lo le mea na ou lagonaina i lona taimi. E foliga mai sa pei o Tina sa faatulagaina i matou e faia se galuega e faamama ai le lapisi. Ae ou te toe tepa i ai, ma ou iloina ai sa ia faia se tasi o tiute faamatua sili ona taua o le faagalulue faatasi lea o fanau ma o latou matua.

E faigata ona fai lona mea i nisi nuu i le taulaga o loo toatele tagata e nonofo ai. O tagata i atunuu tau atiae o le lalolagi lea o loo galulue faatasi ai le tane ma le ava ma fanau i faatoaga araisa e le o maua ai se faafitauli faapena. Ae o le mataupu faavae e aoga i soo se mea, ma e matuai taua lava ia i tatou.

Mataupu Faavae o le Tausiaiga

Sister Lant

Ua e saunoa e uiga i mataupu faavae. Ou te manatu o le mea lona e matuai moomia ona tatou liliu atu i ai i lenei talanoaga atoa aua o aiga ma tulaga faaleaiga e eseese uma lava i le lalolagi atoa. Ae o mataupu faavae o le galue ma le alofa ma le le manatu faapito ma le faamagalalo atu ma le auauna atu, o mataupu faavae na o le talalelei e ao ona tatou o atu i ai ina ia iloa ai le auala e tausia ai a tatou fanau, e iloa ai le auala e fausia ai o tatou sootaga.

Elder Oaks

Ou te manatu o loo aumaia e le folafolaga i le aiga ia i tatou nisi o mataupu faavae e moomia ona tatou faatatau i ai:

"I le fuafuaga paia e tataua ona pulefaamalumu tama i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo o latou aiga. O le uluai matafaioi a tina o le faafaileleina lea o a latou fanau." E le o fai mai e *faatapulaa*. "O nei matafaioi paia e ao i tama ma tina ona fesoasoani le tasi i le isi o se paaga tutusa."

E i ai tulaga e ono moomia ai ona faigaluega le tina. Sa ou ola ae i se aiga faapena. O le ola maloloina o le tama e ono taofia ai o ia mai le faia o ona tiute. Ae o le mataupu faavae o le paaga tutusa i le fofoina o faafitauli, e mafai ai ona foia taitoatasi nei tulaga faatasi ai ma musumusuga a le lagi.

Sister Tanner

Ina ia faia se aiga, ina ia avea ma tausiaiga, e moomia ai le malamalama i ni mataupu faavae mautinoa ma le faataitaia o ni tomai patino. O le tau

leai o ni tomai faatausiaiga—o le uiga o lau tala e le na o le faiga o falaoa—ua faatupuina ai se lagona o le leai o se aiga lea e mafua ai ona i ai tagata e feoai i le auala e leai ni aiga. O tagata ua leai ni fale e o i ai o loo i ai le Agaga, o loo i ai le mausali faalelagona, ma sa aoaoina ai tulaga faatauaina ma mataupu faavae, o loo i ai foi le anoanoai o faafitauli o le lotovaivai, lea o loo maua foi e tagata feoai i le auala e leai ni aiga e pei o le liliu atu i fualaa oona ma uiga le mama. O loo i ai so tatou avanoa, tina ma tama e galulue faatasi ai, e avea ai ma tausiaiga, ina ia faia ai se siosiomaga o le a avea ai ma se aiga. O le fale e le na o se nofoaga; o se lagona, ma o se agaga.

Elder Oaks

Ua ou fiafia ua e talanoa i le tausiaiga aua o le *tausiaiga* o se upu le lelei i manatu o nisi tagata, ae le tataua ai. Ae e moomia ona tatou faauigaina. O le tausiaiga e le na o le faiga o falaoa po o le faamama o le fale. O le tausiaiga o le faia lea o se siosiomaga ia talafeagai e faafailele ai a tatou fanau ia agai atu i le ola faavavau, o loo tatou tiute lea i le avea ai ma matua. Ma o le tausiaiga o se tiute o tama e pei foi o tina.

Sister Lant

Ma o lona fale, e moomia ona avea ma nofoaga saogalemu, o le nofoaga e mafai e tagata uma o le aiga ona o mai i ai ma iloa ai o loo alofaina i latou ma o loo latou saogalemu mai mea o le lalolagi ma o loo manuia i latou.

Elder Oaks

I le mataupu o le faamatuu atu, atonu e tele naua ni galuega o le tausia-

fale e mafai ona faamatuu atu, ae leai ma ni galuega faatausiaiga e mafai ona faamatuuina atu. E le mafai ona tatou faamatuu atu le taitaia o se afiafi faaleaiga. Tatou te le faamatuuina atu ia tatalo faaleaiga. Tatou te le faamatuuina atu le alofa o se tina ma se tama mo fanau po o lena taimi taitoatasi lea e matuai aoga lava mo le tuputupu ae. Ia tatou faia se eseesea i le va o le tausifale ma le tausiaiga.

Sister Lant

E le mafai ona tatou faamatuuina atu na tiutetauave, ae mafai ona tatou faasafua pe faasoa atu.

Elder Oaks

Ioe, e mafai.

Elder Holland

O le mea na ou te'i ai ina ua saunoa Elder Oaks "E le mafai ona e faamatuuina atu" o le le mafai lea ona e faamatuu atu i le nuu, e le mafai ona e faamatuu atu i le au fai pisinisi—

Elder Oaks

E oo lava i le Ekalesia.

Elder Holland

Po o le Ekalesia. O lo'u manatu lena. Sei o tatou talanoa i auala e fesoasoani ma faamanuia ai e le Ekalesia le aiga. E i ai nisi o mea ia e le mafai ma e le tatau ona faia e le Ekalesia—po o se isi lava—pe afai o se mataupu tonu faaleaiga.

Fuafuaina o Gaoioiga

Elder Holland

O a ni fautuaga lautele mo taitai o le Ekalesia ina ia fesoasoani ai ia i latou ia faapaleni le fesoasoani i aiga ma le fuafuaina ma le faakalenaina o gaoioiga ma mea e fai? O le taimi o se

faafitauli lea i uarota ma siteki o le Ekalesia.

Elder Oaks, o le a sa tatou vaai atu i ai i le faakalenaina?

Elder Oaks

Sei o'u talanoa atu lava i epikopo ma peresitene o siteki, o e o loo pulefaamalumu i aufono a uarota ma siteki. Ia tatou manatunatu i taimi faamātua a o tatou faia a tatou fuafuaga, ae le na o le tuu o fonotaga ma gaoioiga uma i le kalena a le Ekalesia ae le mafaufau i le mea na o loo faia i aiga.

Elder Holland

Tatou te mananao e faamanuia tagata taitoatasi, ae e ao ona tatou pui-puia foi le aiga o se iunite.

Sister Beck

I aso la sa fai ai sa'u tamai tulafono mo au lava ia lea ou te manatu e fetai i tagata uma. O se pogai lelei e fai ai se gaoioiga a le uarota po o le siteki ona tatou te manaomia ma o le a faamalosisia ai aiga ma tagata taitoatasi. O se pogai e le lelei e fai ai se gaoioiga ona o se mea ua masani ai pe ona o se aso malolo e ao ona tatou faamanatuina. A tatou talanoa i mamana o le talalelei, ua tatou iloa manaoga. Ia tatou fuafuaina ia gaoioiga e tusa ma na manaoga, ma afai sa manaia se gaoioiga i le tausaga ua tea, e le faapea o le a fai ai ma masani.

Elder Oaks

Ma e mafai ona tatou faapea atu e sili le lelei pe a fai ma le magafagafa fuafuaga a le Ekalesia i tulaga o aiga, ina ia le tele le avega i po o vaiaso ma faaiuga o vaiaso, ma fao ai taimi atonu sa tatau ona faatasi ai se aiga.

E moomia ona tatou faaopoopo atu i lena lapataiga, afai e tele se taimi

tatou te faaavanoaina mo le aiga, e ao foi i matua ona nafa ma le tagai totoia ia mautinoa ia le soona matele i taaloga, matamata i le televise, gaoioiga afeleti a le tagata lava ia, pe soona auai ai i galuega lelei i le lotoifale mo fanau laiti. Matou te le o taumafai e faaleaoga le Ekalesia i le faatautava ma isi gaoioiga. O loo matou taumafai e faatapulaa le faia o fonotaga a le Ekalesia ma gaoioiga a le Ekalesia ia lava se taimi mo aiga. Ma o le aiga e tatau ona faaogaina lena taimi faaopoopo ae le o le valaaulia o isi e faaogaina.

Sister Lant

Tou te silafia, e toe foi ai lava le tiute i le aiga, a ea?

Elder Oaks

O lea lava.

Aufono a le Uarota ma le Aiga

Sister Beck

A fono se aufono a le uarota pe fono se au peresitene, o le tele o taimi latou te talanoa ai "E mafai faapefea ona aumai tagata e lagolago la tatou faalapotopotoga?" po o le "E toatele tagata sa i ai; sa tele le lagolago." O se manatu e matuai sese lava. Afai e fono se aufono a le uarota pe fono se au peresitene, afai latou te amata i le faapea ane, "E mafai faapefea ona tatou lagolagoina le aiga?" Ma o mea tatou te faia o se taunuuga o mea o le a lagolago ai le aiga ae le o le isi itu. Ou te manatu e mafai ona tatou toe liliuina uma i tua ia na manatu.

Elder Oaks

Ma o se autu lelei lena mo aufono a uarota, lea e faatasitasi ai se vaega e pei o lenei ua tatou maua i le asō ma



A oo ina fono se aufono a le uarota po o se au peresitene, e ao ona latou manatu, “Pe mafai faapefea ona tatou lagolago atu i le aiga?”

e tofu le tagata ma ona lava manatu. O le epikopo e faia le faaiuga, ae na te faafofoga atu i vaega uma ma e mafai ona ia taumafai e faatulaga gaoioiga ma fetuunai fuafuaga ina ia taulimaina ai mataupu faavae ia sa tatou talanoa i ai.

Elder Holland

Ou te manatu atonu e taua i le oga-totonu o lenei talanoaga ona taofi ma faapea atu i le aofia o le Ekalesia, e ui ina tatou te lei faamoemoe e fai, ae ua tatou faataitaia atu iinei ia mea tatou te mananao e tupu i alii ma tamaitai i le Ekalesia.

Elder Oaks

I aganuu uma.

Elder Holland

I aganuu uma. O le ala lenei e ao ona talanoa ai aufono a uarota. O le ala lenei e tataua ona talanoa ai tane ma ava. Tatou te migao; tatou te fiafia i ai; tatou te fetuafai manatu. Ma i nisi o aganuu—o se faasalalauaga lenei i le lalolagi atoa—o le a feteenai lenei

mea ma uputuu ma talafaasolopito ma le sitaili a nisi tagata. Ae ao pea lava ona manumalo le aganuu a le talalelei. Ma afai e le o se mea e masani ai i lotoifale po o se tu ma se aga i le lotoifale le faalogo atu i tuafafine po o le mauaina o le faaaloalo maoae e faaalai e nei tuafafine i le au perisitua—o nei mea uma, matou te faamoemoe, o le a faailoa atu ai i le Ekalesia le manaomia ona faalogo atu o le tasi i le isi, ia fealofani, talanoa faatasi, ia maua mai manatu sili ona lelei, tatalo mo le taitaiga, ma maua ni aiga sili ona lelei ma tulai mai ai se Ekalesia e sili ona lelei. Ia le avea lenei mea ma mea faatauvaa ua momoliina atu i la tatou faasalalauaga i lenei afiafi.

Faafetauia o Manaoga ma Punaoa

Elder Oaks

Sa tuuina mai e Elder L. Tom Perry ia i tatou se mataupu faavae ofoofogia i le fonotaga faaleaoaoga mo taitai i le lalolagi atoa ia Ianuari 2003. Ou te fia faitauina atu ni nai upu na ia tuuina

mai ia i tatou, e na ona toe faamamafa atu ai. Ua sili atu le taua i le taimi nei nai lo le mea na i ai i le lima tausaga talu ai ina ua ia faatoa fofogaina mai. Na ia saunoa:

“O le auala lilo i le fausiaina o se paranesi po o se itu, o se uarota po o se siteki o le iloaina lea o ou tagata, ia iloa mea e malolosi ai, o le latou manaoga, ma fausia lau polokalama e faalagolago i le taitaiga o loo maua ma manaoga o tagata. . .

“I mea uma lava tou te faia, ia malamalama, e le faapea o le tele o le sili atu lenei ona lelei. Ia alualu i luma e tusa ai ma le saosasao e faatagaina e lau iunite. Ia faasaosao le malolosi o ou tagata.”

O se mataupu faavae faatupu malosi.

Sister Lant

Ioe. Ma ou te manatu i le auala e oo mai ai lenei aoga i lalo, i se taitai o se ausilali, i se taitai o le Peraimeri i le uarota. O le tele o taimi e te valaauina ai lenei taitai o le Peraimeri, ona ia tagatagai lea i le polokalama a le Peraimeri, ona ia manatu lea, “Ia, o le a faapefea ona ou faia uma nei mea?” Ona ia galue lea i le faia uma o na mea, ona ia toe vaai lea po o a nisi mea e mafai ona ia faia.

E ao ona tatou tuu le aiga ina ia tulaui uma atu i ai galuega ua valaauina i tatou e fai, ona e leai nisi mea tatou te faia. O nisi taimi tatou te aveina ai lenei polokalama, vaai i manaoga o o tatou tagata, ae itiiti mea e fai.

Elder Holland

Ua ou manatua ai na saunoa Elder Scott o nisi taimi o le faalauteleina o lou valaauaga o le laitiiti lea o mea e fai,

ae le o le tele.⁸ Ua tele mea e taulai i ai, ua e faaoga le faautauta. Ua e faateleina le tulaga lelei ae atonu e laitiiti le galuega, e le tele. O se manatu faatupu malosi lena, ou te manatu—e le paie, e le faavaivai, ae ia vaai totoa i le ata tele, e aofia ai le ata tele o le aiga, o nisi taimi e itiiti ai mea e fai.

Sister Lant

Ma o le tele o taimi o nei taitai o ausilali e matuai agavaa lava, e mafai ona latou faia ni mea se tele, ma ua soona fai ai lava. E ao ona tatou faaeteete ina ia aua nei faia lena tulaga, ia taulai atu i tagata ae le o le polokalama.

Poto ma le Faautauta Lelei

Sister Tanner

Ou te talisapaia ia taitai perisitua o e tagai muamua i tulaga o aiga ona faatoa fai ai lea o valaauga. O valaauga e musuia, ae ao foi ona i ai le poto ma le faautauta.

Elder Oaks

O iunite e tolaiti tagata toaaga e tau leai ni tagata faigaluega, ma e tataua ona latou faaeteete ina ia aua le na ona faatumu o valaauga i le faaoga i ai o tagata masani lava e 10 i le uarota ma tuu atu ai ia i latou ia valaauga taifa pe tailima. E le o le ala lena e maua ai se aiga po o se uarota malosi. O se taitai perisitua musuia e ao ona amata i se manatu faapea o matua pisi e le tataua ona tele ni valaauga.

Atonu e tataua ona faaitiiti le polokalama ia fetau ma manaoga o lena mataupu faavae sa aoa mai e Elder Perry i lena faasalalauga o le fonotaga faaleaoga mo taitai i le lalolagi atoa ia Ianuari 2003.

Elder Holland

Ma o le a tatou faailoaina atu uma—e mafai e tagata uma o loo i lenei laulau ona faailoaina atu—e faapea o le ositaulaga o loo avea pea ma se mataupu faavae i le talalelei a Iesu Keriso. Tatou te ositaulaga mo isi i sootaga i aiga. Tou te tauaveina atu lena mea i se mamao sili atu, ma o loo outou i ai i le paranesi ma le uarota ma le siteki. Ua valaauina i tatou uma e fai ni mea e fālō ai ma tuleia i tatou, ma e ao ona tatou faia ni fetuunaiga e faataua i le “O a mea matou te faia e puipua ai lo matou aiga?” ma le “O le a la matou mea e fai ina ia puipua ai le Ekalesia?” “E faapefea ona tatou mautinoa o loo lauolaola le Ekalesia e faapei foi o le aiga?”

E ao ona tatou maua le poto ma le faautauta e fai ai mea uma. E le mafai ona tatou faia uma i se taimi e tasi, ma o isi taimi e le manaomia ai lo tatou faia o mea uma ua tatou faia. Ae o mea taua ou te talitonu o le a faamanuina i tatou e fai.

Sister Beck

Ou te manatua le aoaoga matagofie a Elder Ballard ina ua ia aoaoina i tatou ina ia atamamai. “Ia popoto,” na ia saunoa mai ai, “i le filifilia o nei mea.”⁹ E taua le aoaoga o le ositaulaga. O nisi o amataga ootia o la’u molimau, pe afai ou te toe foi i tua ina ua faatoa ou faapea atu, “O se lotu manaia lenei,” ina ua ou vaai i ou matua o galulue ma tauivi ma aoa o i o laua valaauga. Sa ou aoa mai lena mea. Sa i ai ou faafitauli ma sa ou alu atu i le Alii e ala i la’u lava auaunaga. Ou te le fai atu a le o le aiga po o le galuega. E tataua ona o se faaipopoga

ma se tuufaatasiga o mea ua tatou tautino atu i le Alii ina ia fesoasoani e fausia ai Lona malo ma mea ua tatou tautino atu e fausia ai se aiga. E o faatasi lava. E le faia le tasi ae tuu le isi.

O Le Olioli o le Sapati

Elder Holland

Pe mafai ona ou aioi atu i le tatou vaega faapea ma le lautele o le Ekalesia ina ia tatou faia mea uma e mafaia ina ia aumaia ai le olioli o le Sapati. Ou te le iloa pe i ai nisi mea e mafai ona tatou faia e faalelei ai le lotogatasi o aiga i le Ekalesia nai lo le fiafia atoa i le Aso Sa. Ma o loo tatou fiafia ai. Ou te fiafia i ai. E ui i lo’u pisi, ou te fiafia lava i Aso Sa. Ae o uluai folafolaga faatusi paia, o lea ou te mafaufau manino lava i tua i le Feagaiga Tuai, e oo mai lava i a tatou folafolaga o loo i le Mataupu Faavae ma Feagaiga, e faataua uma lava i le olioli i le Sapati, le olioli e tapuai, ma le fiafia o le Sapati. E mautinoa lava e mafai ona lelei mea tatou te faia i le i ai faatasi i le Sapati. O le a tatou tuumamaina ai nisi o vaega, i nei mau tofiga ina ia mafai ai ona tupu i le fale le taua o le ola i le talalelei.

Sister Beck

Ia, o loo e saunoa foi e uiga i le aso Sapati ma le auala e faalautele ai lena aafiaga. Ou te manatu o le tele o taimi ua avea le pisi ma galuega ua tatou tuu atu ai i le Sapati e fai ai galuega a le Ekalesia ma aveesea ai i tatou mai le mafuaaga moni e ala ai ona tatou o i le lotu. Tatou te o e faafou feagaiga. Afai o le a sauni aiga mo lena mea ma taulai i ai i o latou aafiaga o le Sapati, amata i lena, ou te manatu, o le a umi

lava ona tatou faamanuiaina o tatou aiga. Tatou te o e aai ma feinu i le faamanatuga, ae o isi mea uma, e faaopopo atu i lena. E le o se aafiaga faaleogalua lena; o le pogai autu lea tatou te o ai.

Ou te manatu o isi taimi ona o lo tatou pisi ua le maua ai e a tatou fanau lena savali ona o lo tatou faanatinati. Ma o le mea muamua lena e ao ona tatou aoaoina atu ia i latou.

“O Mai Ia, Ina Aai”

Elder Holland

I le agaga moni o le tausiaiga, i le uiga moni ma le maua o lena upu, ou te faamoemoe e mafai ona tatou toe nonofo i se taumafataga masani o se aiga. Ou te manatu e toetoe lava o soo se tagata suesue e fai mai lava, atonu e leai se mea e sili ona maua ai le lotogatasi i le vaiaso o se aiga nai lo le aai faatasi i se taumafataga e malilie uma i ai.

Sister Beck

O se faataitaiga faatusipaia e sili ona ou fiafia i ai, o loo i le mataupu mulimuli o le Talalelei a Ioane, lea na faapotopoto ai e le Faaola Ona soo i le Sami i Kalilaia. Sa i ai le afi malala ma i'a, ma sa Ia fetalai, “O mai ia, ina aai.” E faamatala mai ai sa tele se sauniuniga sa faia. Ua saunia se taumafataga—e mafai ona e faapea ane, o se meaai a le aiga—ma sa Ia valaaulia i latou e o mai e aai, e le na o le taufe-tuli mai ma aai, ae o mai ma aai. Ona faapea mai lea o le mau, “Ua maoona lava i latou,” ona amata lea ona Ia aoao atu i latou i lena aoaoga matagofie e uiga i le fafagaina o Ana mamoe (tagai Ioane 21:9–15). E i ai se mea i le

aai faatasi ma malolo ma maua ai lena lagona iina. O le a se mea semanu e tupu i Lana aoaoga pe a na fai Na te le saunia le nofoaga e aoao atu ai?

Sa ia faia le nofoaga mo lena aoaoga ofoofogia, ma o le taimi o le taumafataga. Ou te iloa e lei tupu fua lena mea.

Pipiimau i le Aoaoga Faavae

Elder Oaks

I mea uma sa tatou talanoaina, ou te manatu e taua ona tatou aloese mai faataitaiga a le lalolagi i le avea o ni taiala mo matua ma faaipoipoga ma mea uma na e faavavau o latou taua. Ua ou manatua ai le fautuaga a le Aposetolo o Paulo na tuuina atu i tagata o Korinito. O loo tusia lea i le 2 Korinito, mataupu e 6. Na fautua atu

le Aposetolo o Paulo ia i latou o e ua maua le talalelei, ma sa ia fai atu, “[Aua nei] milo faatasi ma e le talitonu; aua o le a le sootaga o i ai a e amiotonu ma e le amiotonu?” (2 Korinito 6:14). Ua tau mai ia i tatou faapea e le mafai ona tatou tutu faatasi, ma milo ma le lalolagi, a o tatou taumafai e fai nei filifiliga taua e faavavau.

Elder Holland

Ma e foliga mai ia te au afai o le a tatou pipii i aoaoga faavae a le Ekalesia—ou te toe foi mai lava i le tatou manatu lea na tatou amata ai lenei talatalanoaga, le manatu lea o se fuafuaga ma fautuaga ua aumai e lo tatou Tama o i le Lagi ae tatou te lei o mai iinei—afai e mafai ona tatou pipii i le aoaoga faavae, o le a tatou sao, o le a tatou maua tali i a tatou tatalo,

Atonu e leai se mea e sili atu ona tuufaatasia ai i le gasologa o le vaiaso se aiga nai lo le talisua faatasi.



ma o le a tatou tumau ai i mataupu faavae moni.

E masani ona ou mafaufau, ma sa ou tauina atu i lau lava fanau e faapea, o matua na soפוia soo ia Chimney Rock ma pasia ai ia Martins Cove (ma e toalaiti e lei oo atu i lena mamao), lea o loo i ai na tuugamau laiti ua soo ai laufanua iloga o lenei Ekalesia—latou te lei faia mo se polokalama po o se gaoioiga faafiafia, sa latou faia ona sa i ai le faatuatua i le talalelei a Iesu Keriso i o latou loto, sa i ai i su o o latou ivi. E na o le pau lena o le ala na mafai ona tanuina ai e na tina lena pepe i totonu o se atigipusa falaoa ma fai mai, “O loo i se mea i o le nuu o le folafolaga. O le a tatou oo atu i le vanu.”

E mafai ona latou faapea mai ona o feagaiga ma aoaoga faavae ma le faatuatua ma faaaliga ma le agaga. Afai e mafai ona tatou taofiofia na mea i totonu o o tatou aiga ma le Ekalesia, atonu e tele isi mea o le a faataunuuna. Atonu e tele ni mea e le manao-mia o le a toulu ese mai le taavale toso. Na tau mai ia te au faapea o na taavaletoso e le tele ni mea e ofi ai. E pei lava ona filifilia e o tatou tuua mea sa latou aveina, atonu o le sene-turi 21 o le a faamalositia tatou e filifili, “O a mea e mafai ona tatou aveina i lenei taavaletoso?” O le totonugalemu o o tatou loto; o le mea lea e oo atu i su o o tatou ivi. O le a tatou maua se aiga ma se Ekalesia manuia pe a mafai ona tatou pipii i faaaliga.

Elder Oaks

Elder Holland, o se manatu manaia lena e faai ai.

Elder Holland

Elder Oaks, Sister Beck, Sister Lant, Sister Tanner, e fai au ma sui o le Ekalesia aoao, e faafetai atu ai. E faafetai atu mo o outou taimi, o lo outou alolofa, o la outou auunaga, o a outou osigataulaga, ma a outou tautinoga o loo i o outou loto e uiga i le olaga faaleaiga ma le alofa faaleaiga i le talalelei a Iesu Keriso. Faafetai lava. Uso e ma tuafafine, faafetai atu ia te outou uma lava.

FAAMATALAGA

1. “O Le Aiga: O Se Folafolaga i le Lalolagi,” *Liabona*, Ian. 1996, 122–23.
2. Gordon B. Hinckley, i le Conference Report, Ape. 2003, 64; po o le *Liabona*, Me 2003, 59; ma le Conference Report, Oke. 1997, 94; po o le *Liabona*, Ian. 1998, 81.
3. Tagai “Thurber,” *Life*, Mat. 14, 1960, 108.
4. John Milton, *Paradise Lost*, tusi 8, laina 601–2.
5. M. Russell Ballard, “Great Shall Be the Peace of Thy Children,” *Ensign*, Ape. 1994, 60.
6. Tagai Pearl S. Buck, “At Home in the World,” *Marriage and Family Living*, Feb. 1942, 2.
7. L. Tom Perry, “Polokalama a le Iunite Faavae,” *Uluai Fonotaga Faaleaaoaoga a Taitai i le Lalolagi Atoa*, Ian. 2003, 10.
8. Tagai Richard G. Scott, “O Le Faavae o Aoaoga a Ausilali,” *Fonotaga Faaleaaoaoga a Taitai i le Lalolagi Atoa*, Ian. 2004, 8.
9. Tagai M. Russell Ballard, i le Conference Report, Oke. 2006, 16–19; po o le *Liabona*, Nov. 2006, 17–20. O nei matafai-paia, e ao i tama ma tina ona fesoa-soani le tasi i le isi o se paaga tutusa. A oo ina fono se aufono a le uarota po o se au peresitene, e ao ona latou manatu, “Pe mafai faapefea ona tatou lagolago atu i le aiga?” Atonu e leai se mea e sili atu ona tuufaatasia ai i le gasolaga o le vaiaso se aiga nai lo le talisua faatasi.

O Se Sulufaiga mai le Lalolagi

PERESITENE THOMAS S. MONSON

Peresitene O Le Ekalesia a Iesu Keriso o le Au Paia o Aso e Gata Ai



Aumaia o le Lagi i Totonu o o Tatou Fale

O’u uso e ma tuafafine, i le agaga o le lotomauualalo ou te faaiuina ai lenei sauniga musuia. O lea sa taulai atu o tatou mafaufauga i le aiga ma le auai ina ua toe faamanatu mai ia i tatou “o le aiga o le faavae lea o le olaga amiotonu, ma e leai lava se isi meafai-galuega e mafai ona suia lona tulaga pe faatinoina ana matafaiioi taua.”¹

E pei ona tatou iloa, e eseese uma lava foliga o aiga. O nisi e aofia ai se tama, tina, uso, ma tuafafine, ae o isi

atonu ua na o se tama pe na o se tina ma se fanau. O isi foi e ono toatasi se tagata e i ai.

Po o le a lava le ituaiga e i ai lo tatou aiga patino, afai tatou te mulimuli i taiala ua faatutu mai i o tatou luma i lenei fonotaga, o le a tatou latalata atili atu i le Alii ma atili tele atu ai se vaega o le lagi tatou te aumaia i totonu o o tatou aiga.

A o femaliuui Iesu i ala pefu o aai ma faoa aai lea ua tatou faaigoaina nei o le Nuu Paia ma aoao atu Ona soo i tafatafa o le lalelei o Kalilaia, e masani ona fetalai o Ia i faataoto, i le gagana e sili ona malamalama ai tagata. E masani ona Ia ta’ua le fausia o fale e faatusa i olaga o i latou sa faalogologo ai.

Sa Ia tautino mai: “O malo . . . uma e fevaevaeai e faaumatia ia” (Mataio 12:25). Mulimuli ane sa Ia lapatai mai, “Faauta, o lo’u fale o le fale faatulagina tonu ma tatau . . . a e le o se fale o le faasoesa” (MFF 132:8).

Ua saga faatupulaia pea le faatumuina o le lalolagi i le fenumia’i ma le fememea’i. Ua siomia i tatou i savali e feteenai ma mea uma tatou te faapele-

pele i ai—e faatosina ai i tatou ina ia fulitua i mea “mama, matagofie, logo-leleia ma tauleleia” (Mataupu Faavae o le Faatuatua 1:13) ma opogi ai le manatu lea e masani ona laualuga i fafo atu o le talalelei a Iesu Keriso. Peitai, a oo ina tutu faatasi o tatou aiga i le faamoemoe, ma laualuga ai se siosiomaga o le filemu ma le alofa, ona avea lea o le aiga ma se sulufaiga mai le lalolagi.

A oo ina tatou le lavava pe mama’i pe lotovaivai, e maeu le matagofie o le toafilemu ona o le mafai ona toe liliu atu i le aiga. Ua faamanuiaina i tatou i le i ai i se li’o o le aiga ma le i ai o se nofoaga i lea lava li’o.

E i ai taimi atonu tatou te fiu ai pe le fiafia ai foi i le aiga ma le auai ma ona siosiomaga masani. Atonu o o tatou fale ma aiga e faale-mananaia tele, ua i ai se lagona ua pasiā, a o isi nofoaga atonu o nisi taimi ua foliga mai e sili atu ona olaola. Ae a oo ina tele naua mea tatou te iloa i le lalolagi ma ua mamao lo tatou o ese atu ma vaaia ai le televave ma le maoae ua i ai le lalolagi i nisi o taimi, ona faatupulaia ai lea o lo tatou lotofaafetai mo le avanoa ua avea ai i tatou ma se vaega o se mea e mafai ona tatou toomaga i ai—o le aiga ma le auai ma le faamaoni a’ia’i o e pele ia i tatou. Ua tatou iloa le uiga o le fusia faatasi i tiute, o le faaaloalo, ma le avea ma se vaega. Ua tatou aoaoina e leai lava se mea e mafai ona suitulaga atoatoa i le sootaga manuia o le olaga faaleaiga.

Tatou te manatua uma aiga na tatou ola a’e ai. O le toatele o i tatou, tatou te le mafaufau i le tele po o le laitiiti o le fale, po o le manaia po o le



A tatou tatalo faatasi ma o tatou aiga i aso taitasi, o le a tatou fesoasoani e saunia le puipuiga tatou te matua manaomia lava i le lalolagi i ona po nei.

le taualoa o le pitonuu. Ae tatou te manatua ma le fiafia aafiaga sa tatou fetufaa'i ai ma o tatou aiga.

Sa ta'ua e Margaret Thatcher, a o avea ma palemia o Peretania Tele, se filosofia maoae e faapea: "O le aiga o le faavae lea o nuu. O se vasega pepe, o se faleaoga, o se falemai, o se fale e evaeva ai, o se maluapapa ma se nofoaga e mapu i ai. Ua atoa i ai se alaala-faga. O le mea lea e faatonutonu ai o tatou talitonuga; o se nofoaga tatou te sauniuni ai mo ituaiga olaga o le a tatou ola ai."²

Se i ou tuuina atu ni taiala se tolu e fesoasoani ai e faamautinoa o le a avea o tatou aiga ma sulufaiga o le fiafia.

O Se Mamanu o le Tatalo

Muamua, tatou faavaeina se mamanu o le tatalo.

I le avea ai o i tatou o se nuu, pe tatou te le faafetai ea aua o loo avea pea le tatalo faaleaiga ma aga o loo tatou faia pea? E leai se vaaiga e sili atu ona matagofie nai lo le vaai atu i se aiga o tatalo faatasi. Na poloai mai le Alii ina ia faia a tatou tatalo faaleaiga ina ua Ia fetalai, "Ia tatalo i o outou aiga i le Tama i lo'u igoa, ina ia manuia a outou ava, ma a outou fanau" (3 Nifae 18:21).

A tatou tatalo faatasi ma o tatou aiga i aso taitasi, o le a tatou fesoasoani e saunia le puipuiga lea tatou te matua manaomia uma lava i lenei lalolagi.

O Se Faletusi o Aoaoga

Lona lua, ia avea o tatou aiga ma se faletusi o aoaoga.

O se vaega taua o la tatou faletusi o aoaoga o tusi lelei. O le faitautusi o se

tasi lea o fiafiaga moni o le olaga. I lo tatou vaitaimi i le anoanoai o faamatalaga ua i ai, ma le tele o mea tatou te vaaia ua ootooina, fetuunai, fesuiiai pe faaseseina foi, saeia, ma aoteleina, e faanofogofie lava ma musuia le mafaufau pe a e nofo lava oe i lalo ma se tusi lelei e faitau.

Ua fautua mai James A. Michener, o se tusitala lauiloa: "E avea se malo ma mea na faitau i ai o latou tupulaga a o talavou. O iina na gaosi ai o latou manatu, ma fuafua ai ma le malosia ana sini."

Na apoapoi mai le Alii, "Ina saili atu ia outou i upu o le poto mai tusi sili ona lelei; ia saili i le aoao, e faapena foi i le suesue ma le faatuatua" (MFF 88:118).

E moni, o tusitusiga paia o loo i ai le faletusi atoa o le aoaoga lea ou te tautala atu ai. Ia tatou faitau soo i ai, e le gata o le tagata lava ia ae faapea foi ma o tatou aiga, ina ia mafai ai ona aoaoina i tatou ma faamalalamaina ma latalata atili atu ai i le Alii.

O Se Talatuu o le Alofa

Lona tolu, ia tatou olioli i se talatuu o le alofa.

E manino lava o nai lesona laiti o le alofa e matauina e tamaiti a o latou pueina e aunoa ma se leo ia faaitaiga a o latou matua. Ia tatou mautinoa o a tatou faaitaiga e aoga ona faaitaitai i ai. A tauaveina e o tatou aiga le talatuu o le alofa, o le a le tuuina mai ia i tatou le a'oa'iga a Iakopo lea o loo tusia i le Tusi a Mamona: "Ua outou tu'imomomoina loto o a outou ava agavaivai, ua mavae atu foi le faatuatua o a outou fanau ona o a outou faa-

a'oa'o leaga i o latou luma; ua oo ae foi i le Atua le masusu o o latou loto e molia ai outou" (Iakopo 2:35).

Ae, ia faatumulia o tatou aiga ma o tatou fale i le alofa: alofa o le tasi i le isi, alofa i le talalelei, alofa i o tatou uso a tagata, ma le alofa i lo tatou Faaola. O lona taunuuga, o le a latalata teisi mai ai le lagi i le lalolagi.

Ia tatou faia o tatou fale ma sulufaiga o le a fia mananao tagata o o tatou aiga e toe foi mai i ai.

O Se Naunautai ma le Aiga

Atonu e i ai nisi o outou e manatuaina le tala i se alii laitiiti lava na aveese faamalosi mai ona matua ma le aiga ma aveina atu i se nuu e mamao ese. I ia tulaga, na tuputupu ae ai le tamaitiiti ma ave ma tamatane e aunoa ma se iloina o ona matua moni po o lona aiga. A o tuputupu ae o ia, sa oo atu i lona loto se naunautai e toe foi i ona matua ma le aiga.

Ae o fea o le a ia sailia ai lona aiga? O fea o le a ona mauaina ai lona tama ma lona tina? E, pe ana sei ona manatuaina foi o laua igoa, semanu e tau i ai sina faamoemoe. I lona naunautai, na ia taumanatunatu ai i se mea na ia manatuaina a o itiiti o ia.

I se tasi aso, sa pei o se musumu-suga na vave oo ia te ia, na ia manatua ai le leo o se logo na tagitagi mai le tumutumu o le falesa o le nuu na faafeiloaiina le taeao o Sapati taitasi. Na fealualuai solo le alii talavou mai lea nuu i lea nuu, ma faalogologo pea mo lona tagitagi masani o le logo. Sa tutusa nisi o logo, o nisi e matua ese lava mai le leo na ia manatuaina.

I se taimi mulimuli, na tu ai le alii talavou ua le lavā i se tasi taeao o le Aso Sa i luma o se falesa i se taulaga e masani ai. Na faalogo lelei o ia a o amata ona tagitagi mai le logo. Na masani o ia i le leo. Sa le pei o isi leo na faalogo i ai, a o le logo lava lena ua ia manatuaina lona tagitagi i aso o lona tamaitiiti. Ioe, o le logo lena. Na moni lava lana tagitagi mai. Na faatumulia ona mata i loimata ma sa faaga-eetia lona loto i le olioli. Na tumu o ia i le loto faafetai. Na faapau ifo le tau-lealea i ona tulivae, ma tepa ae i luga i le falelogo—ma tau atu i le lagi—ma na musumusu o ia i se tatalo o le loto faafetai, "Ia faafetaia le Atua. Ua ou taunuu i le aiga."

Ou te fiafia lava i upu o loo maua i le viiga:

Lo'u aiga e pele ia te au, po o fea
lava ou te alu i ai,

I nuu ese po o vasa laolao,

A o gasolo pea taimi, e momoo
lo'u loto

Ma atili faananau atu mo oe!

E ui ina matagofie o'u siosiomaga
faalenatura,

E agalelei foi ma faamaoni uo,

E ui ina siomia au e tagata e tumu
i le fiafia ma pesega malie,

O lo'u loto, e faananau atu pea
mo oe.³

Ia tatou taumafai pea lava ia ave a tatou aiga ma sulufaiga o le alofa ma le filemu ma le fiafia, lea o le a filifilia e le Agaga o le Alii e mafuta ai. O la'u tatalo lea mo i tatou uma, i le suafa o Iesu Keriso, amene.

FAAAMATALAGA

1. David O. McKay, i le *Family Home Evening Manual* (1965), iii.
2. I le Nicholas Wood, "Thatcher Champions the Family," *The Times*, Me 26, 1988, 24.
3. "O Home Beloved," *Hymns*, no. 337. A tatou tatalo faatasi ma o tatou aiga i aso taitasi, o le a tatou fesoasoani e saunia le puipuiga tatou te matua manaomia lava i le lalolagi i ona po nei.

O LE AIGA

O SE FOLAFOLAGA I LE LALOLAGI

O LE AU PERESITENE SILI MA LE AUFONO A LE AU APOSETOLO E TOASEFULULUA
O LE EKALEZIA A IESU KERISO O LE AU PAIA O ASO E GATA AI

OI MATOU, O LE AU PERESITENE SILI ma le Aufono a le Au Aposetolo e Toasefululua O Le Ekalesia A Iesu Keriso O Le Au Paia O Aso E Gata Ai, matou te ta'utino atu ma le faamaoni, o le faaipopoga i le va o se alii ma se tamaitai, ua faauuina e le Atua, ma o le aiga o le totonugalemu lea o fuafuaga a Lē Foafoa, mo le taunuuga e faavavau o Lana fanau.

OTAGATA SOIFUA UMA - tane ma le fafine - ua foafoaina i le faatusa o le Atua. O i latou taitoatasi o se atalii po o se afafine faaleagaga faapelepele a ni matua faalelagi ma, o lea ua tofu ai i latou taitoatasi ma se natura ma se taunuuga paia. O le tulaga tane po o le fafine (o le tagata,) o se vaega taua lea o le mua'i olaga, olaga faitino, ma lona faamoemoe e faavavau.

ILE MUA'I OLAGA, sa iloa ma tapua'i atalii ma afafine faaleagaga i le Atua o lo latou Tama e Faavavau, ma sa [latou] talia Lana fuafuaga e mafai ai e Lana fanau ona maua ni tino faaletino ma le tomā faalelalogi latou te maua ai le atoatoaga ma iloa tino ai lona taunuuga paia o se suli o le ola e faavavau. O le fuafuaga paia o le fiafia, ua mafai ai ona faaauu fegalegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia aiga e faavavau.

OLE ULUAI POLOAIGA na tuuina e le Atua ia Atamu ma Eva, e faatatau i lo la agavaa mo tulaga faamātua, o se tane ma se ava. Matou te ta'utino atu o le poloaiga a le Atua i Lana fanau ia fanafanau ma ululuola ai le lalolagi, ua faamalosi ma faatumaui. Matou te toe ta'utino atu foi ua poloai mai le Atua, o mana paia o le foafoaina o fanau, ua na o le va lava o le alii ma le tamaitai ua faaipopoina faaletulafono, o se tane ma le ava, e tatau ona faaogaina ai.

MATOU TE TA'UTINO ATU o le ala ua foafoaina ai le ola faitino, ua faatuina i le finagalo paia. Matou te faamaonia le paia o le ola ma lona taua i le fuafuaga e faavavau a le Atua.

OLE TANE MA LE AVA ua i ai le tiutetauave paia e alofa ma tausi e le tasi le isi ma a la fanau. 'O fanau

o le tofi lea mai le Alii' (Salamo 127:3). Ua i ai i matua se tiute paia e tausia a latou fanau i le alofa ma le amiotonu, ia tuuina atu i ai mea e manaomia i le faaleagaga ma le faaletino, ia aoao i latou e alofofa ma feaauunaa'i, ia tausia poloaiga a le Atua ma avea ma tagatanuu usiusitai i tulafono i soo se mea e nonofo ai. O tane ma ava - tina ma tamā - o le a latou tali atu i le Atua mo le faataunuuga o nei mea e ao ona faia.

OLE AIGA ua faauuina e le Atua. O le faaipopoga i le va o le alii ma le tamaitai e taua i Lana fuafuaga e faavavau. E tatau ona fanuina fanau i totonu o feagaiga o le faaipopoga, ma ia tausia e se tamā se tina o ē ua faamamaluina ma le faatuatua atoatoa feagaiga faalelulugalii. E maua le fiafia i le olaga faaleaiga pe a faavae i aoaoga a le Alii o Iesu Keriso. O faaipopoga ma aiga manuia, e faavae ma tumau i mataupu faavae o le faatuatua, tatalo, salamo, faamagaloga, faaloalo, alofa, agalelei, galuega, ma gaoioga faafiafia tuufaatasi. I le fuafuaga paia, e tatau ona pulefaamalumu tamā i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo o latou aiga. O le uluai matafaioi a tina o le faafaileleina lea o a latou fanau. O nei matafaioi paia, e ao i tamā ma tina ona fesoasoani le tasi i le isi o se paaga tutusa. O mea e faaletonu, oti, po o nisi mea e tula'i mai, e alagātatau ai ona fetuutuunai tagata taitoatasi. E tatau i aiga lautele ona tuuina atu le lagolago pe a manaomia.

MATOU TE LAPATAI ATU o tagata taitoatasi o ē ua solia feagaiga o le ola mama, o ē faasaunoa i taitoalua po o fanau, o ē ua faatalalē i le faataunuuga o tiutetauave faaleaiga, o le a i ai se aso tou te tutū atu ai e tali atu i luma o le Atua. E le gata i lea, matou te lapata'i atu foi, o le faamalepeina o le aiga o le a aumai ai i tagata taitoatasi, alaafaga, ma malo, faafanoga ia na ulua'i ta'u mai e perofeta anamua ma aso nei.

MATOU TE VALAAU ATU i tamalii ma failauga ma taitai o malo i soo se mea ina ia faalauiloa atu na fua faatatau ua fuafuaina ina ia faatumaui ma faamalosi le aiga o se iunite faavae o malo.

Sa fofogaina lenei folafolaga e le Susuga a Peresitene Gordon B. Hinckley, o se vaega o lana savali i le Sauniga Aoao a le Aualofa sa fa'ia i le aso 23 o Setema, i le Aai a Sate Leki, Iutā.

O LE EKALEZIA A
IESU KERISO
O LE AU PAIA O ASO
E GATA AI

